



# जैनपदसंग्रह

तृतीय भाग ।



प्रकाशक

जैन ग्रन्थ-रत्नाकर कार्यालय ।





श्रीबीतरागाय नमः

जैनपदसंग्रह

तृतीय भाग ।

अर्थात्

आगरा निवासी कविवर भूधरदासजी कृत  
पदविनतियोंका संग्रह ।

जिसे

श्रीजैन ग्रन्थ-रत्नाकर कार्यालयके मालिकने

ब्रम्हदेके

नेटिव ओपिनियनप्रेसमें वि. वां पराजपेके

प्रबंधसे छपाया ।

भाद्रपद वि० सं० १९८३ ।

द्वितीयावृत्ति ]

\*

[ मूल्य पाँच आने ।

प्रकाशक  
छगनमल बाकलीवाल  
मालिक

जैन ग्रन्थ-रत्नाकर कार्यालय,  
हीराबाग, पो० गिरगांव-बम्बई ।



मुद्रक—  
विनायक वा. परांजपे,  
नेटिव ओपिनियन प्रेस,  
गिरगांव-बॅकरोड, मुंबई.

## पदोंकी वर्णानुक्रमणिका ।

पद संख्या	पद संख्या		
अजित जिन विनता हमारी	४१	जगमे श्रद्धाली जीव जीवनमुक्त	३४
अजित जिनेनुर अग्रहण	७	जपि माला जिनवर नामकी	४४
अन्तर रज्जल करना रे भाई	३६	जिनगज चरन मन मनि विनारे	१७
अथ नित नेमि नान भजो	५४	जिनगज ना विनारो	१६
अथ पुरीकर नीटडी जुन जीया रे	३३	जीवदया वन तरु बडो	६३
अथ मन मेरे वे, सुनि नुनि साँव सयानी	७०	जे जगपूज परमगुरु नामी	७४
अथ मेरे समकित सावन आयो	१९	तहाँ ले चल गे। जहाँ जाडोपति प्यारो	५९
अरज करे गजुल नारी	२८	तुम तरन तारन भवनिवारन	७२
अरे मन चन्दरे, श्रीहथिनापुरकी जात	५७	तुम सुनियो साधो। मनुवा मेग ज्ञानी	५०
अरे। हा चेतो रे भाई	६०	ते गुरु मेरे मन बनो, जे भव०	७७
अहो। जगतगुरु एक, नुनिबोः	७६	त्रिभुवनगुरु स्वामी जी	७५
अज्ञानी पाप धनूग न बोध	५	थाकी कथनी प्ताने प्यारी लगे जी	१३
आज गिगिजके गिबर सुदूर नहीदे	१	नेमि विना न रहे मेरो जिबग	२१
आदि पुरुष मेरी आत भरोजी	४२	नेनानिको वान परी, डग्मनकी	६५
आया रे बुढापा नानी नुनि बुधि	३५	देवे देवे जगतके देव	२६
आरती आदि जिल्दि तुम्हारी	६८	दुजो गरबगहेली गे हेली	२७
एजी मोहि लागिये शान्ति जिनद	३९	देखो भाई। आत्म देव विगजे	५३
ऐनी समझके तिर धूल	३२	देख्यो गे। कहीं नेमिकुमार	१५
ऐनो श्रावक कुल तुन पाप	६४	प्रभु गुन गाथे, यह आसग फेर न	५१
और नव थोथी बातें	४०	पारम-पद-नक्ष-भ्रकाग, अरुन वरन	४७
कृष्णा ल्यो जिनगज हमारी, कृष्णा	७९	पुलकन्त नयन चकोरपक्षी	७१
काया गागि जोजरी, तुम देखो	५५	बन्दी डिगन्धगुस्चरन	७३
गरव नहि कहीजे रे, ऐ नरनिपट गैवार	१२	नगवन्तमजन क्यों मूला रे	२०
चरसा चलता नाही, चरसा हुआ	६७	मले चेत्यो वीर नर तू	७
चिन चेतनकी यह विरिचो रे	३०	मावि देखि छवी भगवानकी	१८
जगन जन जूषा हारि चले	५८	मन मूरख पथी, उत मारग मति जाय	२२
जगमे जीवन धोरा, रे अज्ञानी	११	मनहन। हमारी लो शिक्षा हिनकारी	३८

पद संख्या.		पद संख्या.	
मा विलम्ब न लाव पठाव तहाँ री	१४	शेष सुरेश नरेश रटै तोहि	४८
मेरी जांभ आठौं जाभ	२५	श्रीगुरु शिक्षा देत है सुनि प्रानी रे	७८
मेरे चारों शरन सहार्ई	४३	सब विधि करन उतावला	२३
मेरे मन सूवा, जिनपद	६	सौमधर स्वामी, मे चरननका चेरा	३
म्हे तो थाकी आज महिमा जानी	५६	सुन ज्ञानी प्राणी, श्रीगुरु सीख सयानी	८
यह तन जगम रूखडा सुनियो भवि	६६	सुनि ठगनी माया, तें सब जग ठग	९
रखना नही तनकी खबर, अनहद	८०	सुनि सुजान । पाँचो रिपु वशरि	५२
रटि रमना मेरी ऋपभ जिनद	२४	सुनि सुनि है साथनि । म्हारे मनकी	६९
वा पुरके वाणै जाऊ	४	सो गुरुदेव हमारा है साधो	६१
बीग ! थारी वान बुरी परी रे	३७	सो मत सांचो है मन मेरे	४२
वे कोई अजब तमासा	१०	स्वामीजी साची सरन तुम्हारी	६२
वे मुनिवर कय मिलि है उपगारी	४५	हू तो कहा कर कित जाऊ	२९
लंगी लो नाभिनदनसों	१	होगी सेलौंगी घर आये चिदानन्दकन्त	४६





श्रीजिनाय नम ।

जैन पदसंग्रह ।

तृतीयभाग ।

अर्थात्

कविवर भूधरदासजीकृत भजनोंका संग्रह ।

---

१. राग सौरठ ।

लगी लो नाभिनंदनसों । जपत जेम चकोर  
चकई, चन्द भरताकों ॥ लगी लो० ॥ १ ॥  
जाउ तन धन जाउ जोवन, प्राण जाउ न क्यों ।  
एक प्रभुकी भक्ति मेरे, रहो ज्योंकी त्यों ॥ लगी  
लो० ॥ २ ॥ और देव अनेक सेये, कछु न पायो  
हों । ज्ञान खोयो गांठिको, धन करत कुंवनिज  
ज्यों ॥ लगी लो० ॥ ३ ॥ पुत्र मित्र कलत्र ये सब  
सगें अपनी गों । नरककूपउद्धरन श्रीजिन,  
समझ भूधर यों ॥ लगी लो० ॥ ४ ॥

---

१ बुरा व्यापार । २ गरज ।



## २. राग गौरी ।

अजितजिनेसुर अघहरणं । अघहरणं अ  
 शरणशरणं ॥ टेक ॥ निरखत नैन तनव  
 नहिं त्रपते, आनँदजनक कनकवरणं ॥ अ  
 जित० ॥ १ ॥ करुना भीजे वायक जिनके, गण  
 नायक उर आभरणं । मोह महारिपु धायक,  
 सायक, सुखदायक दुखछयकरणं ॥ अजित०  
 ॥ २ ॥ परमात्म प्रभु पतितउधारन, वारणल-  
 च्छन पगधरणं । मैनमथमारण विपतिविदारण,  
 शिवकारण तारण तरणं ॥ अजित० ॥ ३ ॥  
 भवआतापनिकन्दन चन्दन, जगवंदन वांछा-  
 भरणं । जय जिंनराज जगत वंदत जस, जन  
 भूधर वंदत चरणं ॥ अजित० ॥ ४ ॥

## ३. राग काफ़ी ।

सीमंधरस्वामी, मैं चरननका चेरा ॥ टेक ॥  
 इस संसार असारमें कोई, और न रँच्छक मेरा  
 ॥ सीमंधर० ॥ १ ॥ लख चौरासी जोनिमें मैं, फिरि

१ वचन । २ नाश करनेवाला । ३ वाण । ४ हाथीका चिह्न ।  
 ५ काम । ६ रक्षक ।

फिरि कीनों फेरा । तुम महिमा जानी नहीं प्रभु,  
देख्यादुःख धनेरा ॥ सीमंधर० ॥ २ ॥ भाग उदयतैं  
पाइया अब, कीजै नाथ निबेरा । बेगि दया  
करि दीजिये मुझे, अविचलथान वसेरा ॥ सीमं-  
धर० ॥ ३ ॥ नाम लिये अँघ ना रहै ज्यों, ऊगे  
भान अँधेरा । भूधर चिन्ता क्या रही ऐसा,  
समरथ साहिव तेरा ॥ सीमंधर० ॥ ४ ॥

४. राग सोरठ ।

वा पुरके वारणैं जाऊं ॥ टेक ॥ जम्बूद्वीप  
विदेहमें, पूरव दिश सोहै हो । पुंडरीकिनी नाम  
है, नर सुर मन मोहै हो ॥ वा पुर० ॥ १ ॥ सीमं-  
धर शिवके धनी, जहँ आप विराजै हो । बारह  
गण विच पीठपै, शोभानिधि छाजै हो ॥ वा  
पुर० ॥ २ ॥ तीन छत्र मांथैं दिपैं, वर चामर  
बीजै हो । कोटिक रँतिपति रूपपै, न्यौछावर  
कीजै हो ॥ वा पुर० ॥ ३ ॥ निरखत विरख अशो-

१ अपार । २ मोक्ष । ३ पाप । ४ दग्वाजे । ५ मस्तकपर ।  
६ दुरता है । ७ कामदेव । ८ वृक्ष ।

कको, शोकावलि भाजै हो । वानी वरसै अमृत  
 सी, जलधर ज्यों गाजै हो ॥ वा पुर० ॥ ४ ॥  
 वरसैं सुमनसुहावनैं, सुरदुंदभि गाजै हो । प्रभु  
 तन तेजसमूहसौं, सैसि सूरज लाजै हो ॥ वा  
 पुर० ॥ ५ ॥ समोसरन विधि वरनतैं, बुधि  
 वरन न पावै हो । सब लोकोत्तर लच्छमी, देखैं  
 वनि आवै हो ॥ वा पुर० ॥ ६ ॥ सुरनर मिलि  
 आवैं सदा, सेवा अनुरांगी हो । प्रकट निहारैं  
 नाथकों, धनि वे बड़भागी हो । वा पुर० ॥ ७ ॥  
 भूधर विधिसौं भावसौं, दीनी त्रय फेरी हो ।  
 जैवन्ती वरतो सदा, नगरी जिनकेरी हो ॥  
 वा पुर० ॥ ८ ॥

५. राग सोरठ ।

अज्ञानी पाप धतूरा न बोय ॥ टेक ॥ फल  
 चाखनकी बार भरै दृग, मर है मूरख रोय ॥  
 अज्ञानी० ॥ १ ॥ किंचित् विषयनिके सुख  
 ारण, दुर्लभ देह न खोय । ऐसा अवसर फिर  
 मिलैगा, इस नींदड़ी न सोय ॥ अज्ञानी० ॥

॥ २ ॥ इस विरियाँमें धर्म-कल्प-तरु, सींचत  
स्याने लोय । तू विष वोवन लागत तो सम,  
और अभागा कोय ॥ अज्ञानी० ॥ ३ ॥ जे  
जगमें दुखदायक वेरस, इसहीके फल शोय ।  
यों मन भूधर जानिके भाई, फिर क्यों भोंदू  
होय ॥ अज्ञानी० ॥ ४ ॥

६. राग सोरठ ।

मेरे मन सूवा, जिनपद पींजरे वसि, यार लाव  
न वार रे ॥ टेक ॥ संसारसेवलवृच्छ सेवत,  
गयो काल अपार रे । विषय फल तिस तोड़ि  
चाखे, कहा देख्यौ सार रे ॥ मेरे मन० ॥ १ ॥  
तू क्यों निचिन्तो सदा तोकाँ, तकत काल  
मेंजार रे । दावै अचानक आन तव तुझे, कौन  
लेय उवार रे ॥ मेरे मन० ॥ २ ॥ तू फँस्यो कर्म  
कुफन्द भाई, छुटै कौन प्रकार रे । तैं मोह-पंछी-  
बधक-विद्या, लखी नाहिं गँवार रे ॥ मेरे मन० ॥  
॥ ३ ॥ है अजौं एक उपाय भूधर, छुटै जो

नर धार रे । रटि नाम राजुलरमनको, पशुबंध  
छोड़नहार रे ॥ मेरे मन० ॥ ४ ॥

७. राग सोरठ ।

भलो चेत्यो वीर नर तू, भलो चेत्यो वीर  
॥ टेक ॥ समुझि प्रभुके शरण आयो, मिल्यो  
ज्ञान वजीर ॥ भलो० ॥ १ ॥ जगतमें यह  
जनम हीरा, फिर कहां थो धीर । भली वार  
विचार छाँड़्यो, कुमति कामिनि सीरं ॥ भलो०  
॥ २ ॥ धन्य धन्य दयाल श्रीगुरु, सुमरि  
गुणगंभीर । नरक परतैं राखि लीनों, बहुत  
कीनी भीरं ॥ भलो० ॥ ३ ॥ भक्ति नौका लही  
भागनि, कितैंक भवदधिनीर । ढील अब क्यों  
करत भूधर, पहुँच पैली तीर ॥ भलो० ॥ ४ ॥

८. राग सोरठ ।

सुन ज्ञानी प्राणी, श्रीगुरु सीख सयानी ॥  
टेक ॥ नरभव पाय विषय मति सेवो, ये दुर-  
गति अगवानी ॥ सुन० ॥ १ ॥ यह भव कुल  
यह तेरी महिमा, फिर समझी जिनवानी ॥

इस अवसरमें यह चपलाई, कौन समझ उर  
 आनी ॥ सुन० ॥ २ ॥ चंदन काठ-कनकके भा-  
 जन, भरि गंगाका पानी । तिल खलि राँधत  
 मंदमती जो, तुझ क्या रीस विरानी ॥ सुन०  
 ॥ ३ ॥ भूधर जो कथनी सो करनी, यह बुधि  
 है सुखदानी । ज्यों मशालची आप न देखै,  
 सो मति करै कहानी ॥ सुनि० ॥

९. राग सोरठ ।

सुनि ठगनी माया, तैं सव जग ठग खाया ॥  
 टेक ॥ टुक विश्वास किया जिन तेरा, सो मूरख  
 पिछताया ॥ सुनि० ॥ १ ॥ आपा तनक दिखाय  
 बीज ज्यों, मूढमती ललचाया । करि मद अंध  
 धर्म हर लीनों, अंत नरक पहुँचाया ॥ सुनि० ॥ २ ॥  
 केते कंथ किये तैं कुलटा, तो भी मन न अघा-  
 या । किसहीसों नहिं प्रीति निवाही, वह तजि  
 और लुभाया ॥ सुनि० ॥ ३ ॥ भूधर छलत फिरै यह  
 सवकों, भौंदू करि जग पाया । जो इस ठगनीकों  
 ठग बैठे, मैं तिसको सिर नाया ॥ सुनि० ॥ ४ ॥

१०.

वे कोई अजब तमासा, देख्या बीच जहान  
 वे, जोर तमासा सुपनेकासा ॥ टेक ॥ एकौके  
 घर मंगल गावैं, पूंगी मनकी आसा । एक वि-  
 योग भरे बहु रोवैं, भरि भरि नैन निरासा ॥  
 वे कोई० ॥ १ ॥ तेज तुरंगनिपै चढ़ि चलते,  
 पहिरैं मलमल खासा । रंक भये नागे अति डोलैं,  
 ना कोइ देय दिलासा ॥ वे कोई० ॥ २ ॥ तरकैं  
 राज तखतपर बैठा, था खुशवक्त खुलासा ।  
 ठीक दुपहरी मुहत्त आई, जंगल कीना वासा ॥  
 वे कोई० ॥ ३ ॥ तन धन अथिर निहायत जगमें,  
 पानीमाहिं पतासा । भूधर इनका गरब करैं जे,  
 फिट तिनका जनमासा ॥ वे कोई० ॥ ४ ॥

११. राग ख्याल ।

जगमें जीवन थोरा, रे अज्ञानी जागि ॥टेक॥  
 जनम ताड़ तरुतैं पड़ै, फल संसारी जीव । मौत  
 महीमें आय हैं, और न ठौर सदीव ॥ जगमें०

१ पूरी हुई । २ धीरज । ३ सबेरे । ४ सिहासन । ५ सर्वथा ।  
 ६ धिक् । ७ मनुष्यजन्म ।

॥ १ ॥ गिर-सिर दिवँला जोइया, चहुँदिशि  
चाँजै पौन । बलंत अचंभा मानिया, बुझत अ-  
चंभा कौन ॥ जगमें० ॥ २ ॥ जो छिन जाय सो  
आयुमैं, निशि दिन ठूँकै काल । बांधि सकै तो  
है भला, पानी पहिली पाल ॥ जगमें० ॥ ३ ॥ मनुष-  
देह दुर्लभ्य है, मति चूँकै यह दाव । भूधर राजुल-  
कंतकी, शरण सिताबी आव ॥ जगमें० ॥ ४ ॥

१२. राग ख्याल ।

गरव नहिं कीजै रे, ऐ नर निपट गँवार ॥  
टेक ॥ झूठी काया झूठी माया, छाया ज्यों लखि  
लीजै रे ॥ गरव० ॥ १ ॥ कै छिन सांझ सुहागरु  
जोबन, कै दिन जगमें जीजै रे ॥ गरव० ॥ २ ॥  
वेगै चेत विलम्ब तजो नर, बंध बढै तिथिँ छीजै  
रे ॥ गरव० ॥ ३ ॥ भूधर पलपल हो है भारी,  
ज्यों ज्यों कमरी भीजै रे ॥ गरव० ॥ ४ ॥

१३. राग ख्याल ।

थांकी कथनी म्हानैं प्यारी लगै जी, प्यारी

१ दीपक । २ चले । ३ निकट आवे । ४ श्रीनेमिनाथकी ।  
५ जीवैगे । ६ जल्दी । ७ आयु ।



लगै म्हांरी भूल भगै जी ॥ टेक ॥ तुमहित हांक  
 विना हों श्रीगुरु, सूतो जियरो काई जगै जी ॥  
 थांकी० ॥ १ ॥ मोहनिधूलि मेलि म्हारे मांथै,  
 तीन रतन म्हांरा मोह ठगै जी । तुम पद ढो-  
 कैंत सीस झरी रज, अब ठगको कर नाहिं वगै  
 जी ॥ थांकी० ॥ २ ॥ दूख्यो चिर मिथ्यात महा-  
 ज्वर, भाँगां मिल गया वैद मँगै जी । अंतर  
 अरुचि मिटी मम आतम, अब अपने निजदर्व  
 पगै जी ॥ थांकी० ॥ ३ ॥ भव वन भ्रमत बड़ी  
 तिसना तिस, क्योंहि बुझै नहिं हिर्यरा दंगै जी ।  
 भूधर गुरुउपदेशामृतरस, शान्तमई आनंद  
 उमगै जी ॥ थांकी० ॥ ४ ॥

१४. राग ख्याल ।

मा विलंब न लाँव पँठाव तँहाँ री, जहँ जग-  
 पति पिय प्यारो ॥ टेक ॥ और न मोहि सुहाय  
 कछू अब, दीसै जगत अँधारो री ॥ मा विलंब०

१ कैसे । २ मेरे । ३ सिरपर । ४ मेरा । ५ प्रणाम करनेसे ।  
 ६ भाग्यसे । ७ मार्गमें । ८ हृदय । ९ जलता है । १० कर ।  
 ११ भेज दे । १२ उसी जगह ।

॥ १ ॥ में श्रीनेमिदिवाकरको कव, देखों वदन  
 उजारो । विन देखें मुरझाय रह्यो है, उर अरविंद  
 हमारो री ! ॥ मा विलंब० ॥ २ ॥ तन छाया ज्यों  
 संग रहोंगी; वे छांडहिं तो छारो । विन अपराध  
 दंड मोहि दीनो, कहा चलै मेरो चारो ॥ मा  
 विलंब० ॥ ३ ॥ इहि विधि रागउदय राजुलनै,  
 सह्यो विरह दुख भारो । पीछें ज्ञानभान बल  
 विनश्यो, मोह महातम कारो री ॥ मा विलंब०  
 ॥ ४ ॥ पियके पैड़े पैड़ौ कीनों, देखि अथिर  
 जग सारो । भूधरके प्रभु नेमि प्रियासों, पाल्यौ  
 नेह करारो री ॥ मा विलंब० ॥ ५ ॥

१५. राग ख्याल ।

देख्यो री ! कहीं नेमिकुमार ॥ टेक ॥ नैननि  
 प्यारो नाथ हमारो, प्रानजीवन प्रानन आधार ॥  
 देख्यो० ॥ १ ॥ पीव वियोग विधा बहु पीरी,  
 पीरी भई हलदी उँनहार । होउं हरी तवही जव  
 भेटों, श्यामवरन सुंदर भरतार ॥ देख्यो० ॥ २ ॥

१ सूरज । २ कमल । ३ सूर्य । ४ पीड़ा की । ५ पीली ।  
 ६ समान ।

विरह नदी असराल बहै उर, बूड़त हौं वामें  
निरंधार । भूधर प्रभु पिय खेवटिया विन, सम-  
रथ कौन उतारनहार ॥ देख्यो० ॥ ३ ॥

१६. राग पंचम ।

जिनराज ना विसारो, मति जन्म वादि  
हारो ॥ टेक ॥ नर भौ आसान नाहीं, देखो  
सोच समझ वारो ॥ जिनराज० ॥ १ ॥ सुत  
मात तात तरुनी, इनसौं ममत निवारो । सबही  
सगे गरजके दुखसीर नहिं निहारो ॥ जिनराज०  
॥ २ ॥ जे खाँयँ लाभ सब मिलि, दुर्गतमें तुम  
सिधारो । नटका कुटंब जैसा, यह खेल यों  
विचारो ॥ जिनराज० ॥ ३ ॥ नाहक पराये  
काजें, आपा नरकमें पारो । भूधर न भूल जगमें,  
जाहिर दगा है यारो ॥ जिनराज० ॥ ४ ॥

१७. राग नट ।

जिनराज चरन मन मति विसरै ॥ टेक ॥ को  
ज्ञानें किहिं वार कालकी, धार अचानक आनि

१ अथाह । २ निराधार । ३ वृथा खोजो । ४ सहज । ५ स्त्री ।  
६ वृथा । ७ समय । ८ धाड़ ।

परै ॥ जिनराज० ॥ १ ॥ देखत दुख भजि जाहिं  
 दशों दिश, पूजत पातकपुंज गिरै । इस संसार  
 क्षारसागरसौं, और न कोई पार करै ॥ जिन-  
 राज० ॥ २ ॥ इक चित ध्यावत वांछित पावत,  
 आवत मंगल विघन टरै । मोहनि घूलि परी  
 मांथैं चिर, सिर नावत ततकाल झरै ॥ जिन-  
 राज० ॥३॥ तवलौं भजन सँवार सयानै, जवलौं  
 कफ नहिं कंठ अरै । अगनि प्रवेश भयो घर  
 भूधर, खोदत कूप न काज सरै ॥ जिनराज० ॥४॥

१८. राग सारंग ।

भवि देखि छयी भगवानकी ॥ टेक ॥ सुंदर  
 सहज सोम आनंदमय, दाता परम कल्याणकी ॥  
 भवि० ॥१॥ नासादृष्टि मुदित मुखवारिज, सीमा  
 सब उपमानकी । अंग अडोल अचल आसन दिढ़,  
 वही दशा निज ध्यानकी ॥ २ ॥ इस जोगासन  
 जोगरीतिसौं. सिद्ध भई शिवधानकी । ऐसैं  
 प्रगट दिखावै मारग, मुद्रा धात पखानकी ॥

भवि० ॥३॥ जिस देखें देखन अभिलाषा, रहत  
न रंचक आनकी । तृपत होत भूधर जो अब  
ये, अंजुलि अम्रतपानकी ॥ भवि० ॥ ४ ॥

१९. राग मलार ।

अब मेरैं समकित सावन आयो ॥ टेक ॥  
बीति कुरीति मिथ्यामति ग्रीषम, पावस सहज  
सुहायो ॥ अब मेरैं० ॥ १ ॥ अनुभव दामिनि दमकन  
लागी, सुरति घटा धन छायो । बोलै विमल  
विवेक पपीहा, सुमति सुहागिन भायो ॥ अब  
मेरैं० ॥ २ ॥ गुरुधुनि गरज सुनत सुख उपजै,  
मोर सुमन विहसायो । साधक भाव अँकूर उठे  
बहु, जित तित हरष सबायो ॥ अब मेरैं० ॥ ३ ॥  
भूल धूल कहिं मूल न सूझत, समरस जल झर  
लायो । भूधर को निकसै अब बाहिर, निज  
निरैचू घर पायो ॥ अब मेरैं० ॥ ४ ॥

२०. राग सोरठ ।

/भगवन्तभजन क्यों भूला रे ॥ टेक ॥ यह

१ अन्यकी । २ वर्षाऋतु । ३ विजुली । ४ मेघ । ५ जिसमें पानी नहीं चूता है ।

संसार रैनका सुपना, तन धन वारि-ववूला रे ॥  
 भगवन्त० ॥ १ ॥ इस जोवनका कौन भरोसा,  
 पावकमें तूणपूला रे ! । काल कुदार लिये सिर  
 ठाड़ा, क्या समझै मन फूला रे ! ॥ भगवन्त०  
 ॥ २ ॥ स्वारथ साथै पाँच पाँव तू, परमारथकों  
 लूला रे ! । कहु कैसें सुख पैहै प्राणी, काम करै  
 दुखमूला रे ॥ भगवन्त० ॥ ३ ॥ मोह पिशाच  
 छल्यो मति मारै, निज कर कंध वसूला रे ।  
 भज श्रीराजमतीवर भूधर, दो दुरमति सिर  
 धूला रे ॥ भगवन्त० ॥ ४ ॥

२१. राम विहागरो ।

नेमि विना न रहै मेरो जियरा ॥ टेक ॥ हेरै  
 री हेली तपत उर कैसो, लावत क्यों निज हाथ  
 न निर्यरा ॥ नेमि विना० ॥ १ ॥ करि करि दूर  
 कपूर कमल दल, लगत करूर कंलाधर सियरा ॥

१ जलका । २ बुदबुदा । ३ घासका पूला । ४ लंगडा । ५ नेमिनाथ ।  
 ६ देव री । ७ सहेली-सखी । ८ निकट । ९ क्रूर । १० चंद्र ।  
 ११ जातल ।

नेमि विना० ॥ २ ॥ भूधर के प्रभु नेमि पिया विन,  
शीतल होय न राजुल हियरा ॥ नेमि विना० ॥ ३ ॥

२२. राग ख्याल ।

मन मूरख पंथी, उस मारग मति जाय रे  
॥ टेक ॥ कामिनि तन कांतार जहां है, कुच परवत  
दुखदाय रे ॥ मन मूरख० ॥ १ ॥ काम किरात  
बसै तिह थानक, सरवस लेत छिनाय रे । खाय  
खता कीचकसे बैठे, अरु रावनसे राय रे ॥ मन  
मूरख० ॥ २ ॥ और अनेक लुटे इस पैड़े,  
वरनै कौन बढ़ाय रे । वरजत हों वरज्यौ रह  
भाई, जानि दगा मति खाय रे ॥ मन मूरख०  
॥ ३ ॥ सुगुरु दयाल दया करि भूधर, सीख कहत  
समझाय रे । आगै जो भावै करि सोई, दीनी  
बात जताय रे ॥ मन मूरख० ॥ ४ ॥

२३. राग विलावल ।

सब विधि करन उँतावला, सुमरनकों सीराँ  
॥ टेक ॥ सुख चाहै संसारमें, यों होय न नीरा ॥

१ वन । २ भील । ३ स्थानमें । ४ धोखा । ५ रास्ते । ६ जल्दबाज ।  
७ ठढा-सुस्त ।

सब विधि० ॥ १ ॥ जैसे कर्म कमाय है, सो ही फल वीरा ! । आम न लागै आकके, नग होय न हीरा ॥ सब विधि० ॥ २ ॥ जैसा विषयनिकों चहे, न रहै छिन धीरा । त्यों भूधर प्रभुकों जपै, पहुँचे भवतीरा ॥ सब विधि० ॥ ३ ॥

२४. राग विलावल ।

रटि रसना मेरी ऋषभ जिनन्द, सुर नर जच्छ चकोरन चन्द ॥ टेक ॥ नामी नाभि नृपतिके बाल, मरुदेवीके कँवर कृपाल ॥ रटि० ॥ १ ॥ पूज्य प्रजापति पुरुष पुरान, केवल किरन धरै जगभान ॥ रटि० ॥ २ ॥ नरकनिवारन विरद विख्यात, तारन तरन जगतके तात ॥ रटि० ॥ ३ ॥ भूधर भजन किये निरबाह, श्रीपद-पदम भँवर हो जाह ॥ रटि० ॥ ४ ॥

२५. राग गौरी ।

मेरी जीभ आठौं जाम, जपि जपि ऋषभ-जिनिंदजीका नाम ॥ टेक ॥ नगर अजुध्या उत्तम ठाम, जनमें नाभि नृपतिके धाम ॥ मेरी० ॥ १ ॥ सहस अठोत्तर अति अभिराम, लसत सुलच्छन



लाजत काम ॥ मेरी० ॥ २ ॥ करि श्रुति गान  
 थके हरि राम, गनि न सके गणधर गुनग्राम ॥  
 मेरी० ॥ ३ ॥ भूधर सार भजन परिनाम, अर  
 सब खेल खेलके खांम (?) ॥ मेरी० ॥ ४ ॥

२६. राग धमाल ।

देखे देखे जगतके देव, राग रिससौं भरे ॥  
 टेक ॥ काहूके सँग कामिनि कोऊ आयुधवान  
 खरे ॥ देखे० ॥ १ ॥ अपने औगुन आपही हो,  
 प्रकट करें उधरे । तऊ अबूझ न बूझहिं देखो,  
 जन मृग भोरैप रे ॥ देखे० ॥ २ ॥ आप भि-  
 खारी है किनही हो, काके दलिद हरे । चढ़ि  
 पाथरकी नावपै कोई, सुनिये नाहिं तरे ॥ देखे०  
 ॥ ३ ॥ गुन अनन्त जा देवमै औ, ठारह दोष  
 टरे । भूधर ता प्रति भावसौं दोऊ, कर निज  
 सीस धरे ॥ देखे० ॥ ४ ॥

२७

देखो गरबगहेली री हेली ! जादोंपतिकी  
 नारी ॥ टेक ॥ कहां नेमि नायक निज मुखसौं,

१ देखेसे । २ भोऊपन ।

टँहल कहै वड़भागी । तहां गुमान कियो मति-  
हीनी, सुनि उर दौंसी<sup>१</sup> लागी ॥ देखो० ॥ १ ॥  
जाकी चरण धूलिको तरसैं, इन्द्रादिक अनु-  
रागी । ता प्रभुको तन-बैसन न पीड़ै,<sup>२</sup> हा ! हा !  
परम अभागी ॥ देखो० ॥ २ ॥ कोटि जनम  
अघभंजन जाके, नामतनी वलि जइये । श्रीहं-  
रिवंशतिलक तिस सेवा, भाग्य विना क्यों पइये ॥  
देखो० ॥ ३ ॥ धनि वह देश धन्य वह धरनी,  
जगमें तीरथ सोई । भूधरके प्रभु नेमि नवल  
निज, चरन धरैं जहाँ दोई ॥ देखो० ॥ ४ ॥

२८. राग घमाल सारंग ।

अरज करै राजुल नारी, वनवासी पिया तुम  
क्यों छँरी ? ॥ टेक ॥ प्रभु तो परम दयाल सब-  
निपै, सबहीके हितकारी । मोपै कठिन भये क्यों  
साजन !, कहिये चूक हमारी ॥ अरज० ॥ १ ॥  
अव ही भोगं-जोग हो वालम, यह बुधि कौन  
विचारी । आगें ऋषभदेवजी व्याही, कच्छ-

१ चाकरी, वस्त्र निचोड़नेके लिए । २ दावागिरी । ३ धोती ।  
४ निचोड़ै । ५ श्रीनेमिनाथ ।

सुकच्छकुमारी । सोई पंथ गहो पिय पाछैं, हूजौ  
 संजमधारी ॥ अरज० ॥ २ ॥ तुम विन एक  
 पलक जो प्रीतम, जाय पहर सौ भारी । कैसें  
 निशदिन भरौं नेमिजी !, तुम तो ममता डारी ।  
 याको ज्वाब देहु निरमोही !; तुम जीते मैं  
 हारी ॥ अरज० ॥ ३ ॥ देखो रैनवियोगिनि  
 चकई, सो विलखै निशि सारी । आश बाँधि  
 अपनो जिय राखै, प्रात मिलैं पिय प्यारी । मैं  
 निराश निरधारिनि कैसें, जीवों अती दुखारी ॥  
 अरज० ॥ ४ ॥ इह विधि विरह नदीमें व्याकुल,  
 उग्रसेनकी बारी । धनि धनि समुद्रविजयके  
 नंदन, बूड़त पार उतारी । करहु दयाल दया  
 ऐसी ही, भूधर शरन तुम्हारी ॥ अरज० ॥ ५ ॥

२९. राग धमाल सारंग ।

हूं तो कहा करूं कित जाउं, सखी अब  
 कासौं पीर कहूं री ! ॥ टेक ॥ सुमति सती सखि-  
 यनिके आगैं, पियके दुख परकासै । त्रिदानन्द-  
 वल्लभकी वनिता, विरह वचन मुख भासै ॥ हूं  
 तो० ॥ १ ॥ कंत विना कितने दिन बीते, कौलौं

धीर धरौं री । पर घर हँडै निज घर छाँडै,  
 कैसी विपति भरौं री ॥ हूँ तो० ॥ २ ॥ कहत  
 कहावतमें सब यों ही, वे नायक हम नारी । पै  
 सुपनै न कभी मुँह बोले, हमसी कौन दुखारी ॥  
 हूँ तो० ॥ ३ ॥ जइयो नाश कुमति कुलटाको,  
 विरमायो पति प्यारो । हमसौं विरचि रच्यो  
 रँग बाके, असमझ (?) नाहिं हमारो ॥ हूँ तो०  
 ॥ ४ ॥ सुंदर सुघर कुलीन नारि मैं, क्यों प्रभु  
 मोहि न लौरें । सत हूँ देखि दया न धरें चित,  
 चेरीसों हित जोरें ॥ हूँ तो० ॥ ५ ॥ अपने  
 गुनकी आप बड़ाई, कहत न शोभा लहिये ।  
 ऐरी ! वीर चतुर चेतनकी, चतुराई लखि  
 कहिये ॥ हूँ तो० ॥ ६ ॥ करिहौं आजि अरज  
 जिनजीसों, प्रीतमको समझावैं । भरता भीख  
 दई गुन मानौं, जो बालम घर आवैं ॥ हूँ तो०  
 ॥ ७ ॥ सुमति वधू यों दीन दुहागनि, दिन  
 दिन झुरत निरासा । भूधर पीउ प्रसन्न भये  
 ह्विन, वसै न तिय घरवासा ॥ हूँ तो० ॥ ८ ॥

## ३०. राग सोरठ ।

चित ! चेतनकी यह विरियाँ रे ॥ टेक ॥  
 उत्तम जनम सुतन तरुनापौ, सुकृत बेल फल  
 फरियाँ रे ॥ चित० ॥१॥ लहि सत संगतिसौं सब  
 समझी, करनी खोटी खरियाँ रे । सुहित सँभा-  
 लि शिथिलता तजिकै, जाहँ बेली झरियाँ रे ॥  
 चित० ॥ २ ॥ दल बल चहल महल रूपेका, अर  
 कंचनकी कलियाँ रे । ऐसी विभव बढी कै बढि  
 है, तेरी गरज क्यां सरियाँ रे ॥ चित० ॥ ३ ॥  
 खोय न वीर विषय खल साँटै, ये कोरनकी  
 धरियाँ रे । तोरि न तनक तँगाहित भूधर,  
 मुकताफलकी लरियाँ रे ॥ चित० ॥ ४ ॥

## ३१. राग पंचम ।

आज गिरिराजके शिखर सुंदर सखी, होत है  
 अतुल कौतुक महा मनहरन ॥ टेक ॥ नाभिके  
 नंदकौं जगतके चन्दकौं, ले गये इन्द्र मिलि जन्म-  
 मंगल करन ॥ आज० ॥१॥ हाथ हाथन धरे सुरन

१ जवानी । २ पुण्य । ३ बदलेमें । ४ करोड़ोंकी । ५ धागा. डोराके  
 लिए । ६ रहीं ।

कंचन घरे. छीरसागर भरे नीर निरमल वरन ।  
 सहस अर आठ गिन एक ही वार जिन, सीस  
 सुरईशके करन लागे ढरन ॥ आज० ॥ २ ॥  
 नचत सुरसुन्दरीं रहस रससों भरीं, गीत गावैं  
 अरी दैहिं ताली करन । देव दुंदभि वजै वीन  
 वंसी सजे, एकसी परत आनंद घनकी भरन ॥  
 आज० ॥ ३ ॥ इन्द्र हर्षित हिये नेत्र अंजुल  
 किये, तृपति होत न पिये रूपअमृतझरन । दास  
 भूघर भनें सुदिन देखें वनें, कहि थकें लोक  
 लख जीभ न सकै वरन ॥ आज० ॥ ४ ॥

३२

ऐसी समझके सिर धूल ॥ ऐसी० ॥ टेक ॥  
 धरम उपजन हेत हिंसा, आचरें अघमूल ॥  
 ऐसी० ॥ १ ॥ छके मत-भद-पान पीके, रहे  
 मनमें फूल । आम चाखन चहैं भोंदू, वोय पेड़  
 वँवूल ॥ ऐसी० ॥ २ ॥ देव रागी लालची गुरु,  
 सेय सुखहित भूल । धर्म नगकी परख नाहीं,  
 भ्रम हिंडोले झूल ॥ ऐसी० ॥ ३ ॥ लाभकारन

रतन विणजै, परखको नहिं मूल । करंत इहि  
विधि वणिज भूधर, विनस जै है मूल ॥  
ऐसी० ॥ ४ ॥

३३

अव पूरीकर नींदड़ी, सुन जीया रे ! चिर-  
काल तू सोया ॥ सुन० ॥ टेक ॥ माया मैली  
रातमें, केता काल विगोया ॥ अब० ॥१॥ धर्म  
न भूल अयान रे ! विषयोंवश वाला । सार  
सुधारस छोड़के, पीवै जहर पियाला ॥ अब०  
॥२॥ मानुष भवकी पैठमें, जग विणजी आया ।  
चतुर कमाई कर चले, मूढ़ों मूल गुमाया ॥  
अब० ॥ ३ ॥ तिसना तज तप जिन किया,  
तिन बहु हित जोया । भोगमगन शठ जे रहे,  
तिन सरवस खोया ॥ अब० ॥४॥ काम विथा-  
पीड़ित जिया, भोगहि भले जानै । खाज खुजा-  
वत अंगमें, रोगी सुख मानै ॥ अब० ॥ ५ ॥  
राग उरगनी जोरतैं, जग डसिया भाई !  
जिय गाफिल हो रहे, मोह लहर चढ़ाई ॥

१ शहर । २ खोया । ३ सर्पनी ।

अव० ॥ ६ ॥ गुरु उपगारी गारुड़ी, दुख देख  
निवारें । हित उपदेश सुमंत्रसों, पढ़ि जहर  
उतारें ॥ अव० ॥ ७ ॥ गुरु माता गुरु ही  
पिता, गुरु सज्जन भाई । भूधर या संसारमें,  
गुरु शरनसहाई ॥ अव० ॥ ८ ॥

३४. गग वंगाला ।

जगमें श्रद्धानी जीव जीवनमुक्त होंगे ॥  
टेक ॥ देव गुरु सांचे मानें, सांचो धर्म हिये  
आनैं, ग्रंथ ते ही सांचे जानैं, जे जिनउक्त  
होंगे ॥ जगमें० ॥ १ ॥ जीवनकी दया पालें,  
झूठ तजि चोरी टालें, परनारी भालें नैन जिनके  
लुंक्त होंगे ॥ जगमें० ॥ २ ॥ जीयमें सन्तोष  
घारें हियें समता विचारें, आगें को न बंध पारें,  
पालेंसों चुक्त होंगे ॥ जगमें० ॥ ३ ॥ बाहिज  
क्रिया अराधैं, अन्तर सरूप साधैं, भूधर ते मुक्त  
लाधैं, कहूं न रुक्त होंगे ॥ जगमें० ॥ ४ ॥

१ जहर उतारनेवाले । २ इस पदार्थ चारों टेकें निकाल डालनेसे  
एक घनाक्षरी ( ३२ वर्ण ) कवित्त बन जाता है । ३ उक्त, प्रणीत,  
कहे हुए । ४ देवनेमें । ५ छिपते हैं, लज्जित होते हैं ।



## ३५. राग बंगाला ।

आया रे बुढापा मानी सुधि बुधि विसरानी  
 ॥ टेक ॥ श्रवनकी शक्ति घटी, चाल चलै अट-  
 पटी, देह लैटी भूख घटी, लोचन झरत पानी ॥  
 आया रे० ॥१॥ दाँतनकी पंक्ति टूटी, हाड़नकी  
 संधि छूटी, कायाकी नगरि लूटी, जात नहिं  
 पहिचानी ॥ आया रे० ॥ २ ॥ बालोंने बैरन  
 फेरा, रोगने शरीर घेरा, पुत्रहू न आवै नेरा,  
 औरोंकी कहा कहानी ॥ आया रे० ॥२॥ भूधर  
 समुझि अब, स्वहित करैगो कब, यह गति है है  
 जब, तब पिछतैहै प्रानी ॥ आया रे० ॥ ४ ॥

## ३६. राग सोरठ ।

अन्तर उज्जल करना रे भाई ! ॥ टेक ॥ कपट  
 कृपान तजै नहिं तबलौं, करनी काज न सरना  
 रे ॥ अन्तर० ॥ १ ॥ जप तप तीरथ जज्ञ  
 व्रतादिक, आगमअर्थउचरना रे । विषय कंषाय  
 कीच नहिं धोयो, यों ही पचि पचि मरना रे ॥

१ इसकी भी टेकें निकाल देनेसे घनाक्षरी बन जाता है ।  
 २ कमजोर हुई । ३ रंग । ४ निकट ।

अन्तर१ ॥ २ ॥ बाहिर भेष क्रिया उर शुचिसों  
कीयें पार उतरना रे । नाहीं है सब लोक रं-  
जना, ऐसे वेदन वरना रे ॥ अन्तर० ॥ ३ ॥  
कामादिक मनसों मन मैला, भजन किये क्या  
तिरना रे । भूधर नीलंबसनपर कैसें, केसररंग  
उछरना रे ॥ अन्तर० ॥ ४ ॥

३७. राग सोरठ ।

वीरा ! थारी वान बुरी परी रे, वरज्यो मा-  
नत नाहिं ॥ टेक ॥ विषय विनोद महा बुरे रे,  
दुख दाता सरवंग । तू हटसों ऐसैं रमै रे, दीवे  
पड़त पतंग ॥ वीरा० ॥ १ ॥ ये सुख हैं दिन  
दोयके रे, फिर दुखकी सन्तान । कैरै कुहाड़ी  
लेइकै रे, मति मारै पैग जानि ॥ वीरा० ॥ २ ॥  
तनक न संकट सहि सकै रे ! छिनमें होय अ-  
धीर । नरक विपति बहु दोहली रे, कैसे भरि  
है वीर ॥ वीरा० ॥ ३ ॥ भव सुपना हो जायगा  
रे, करनी रहेगी निदान । भूधर फिर पछता-  
यगा रे, अब ही समुझि अजान ॥ वीरा० ॥ ४ ॥

१ काले कपड़ेपर । २ द्वीपकर्म । ३ अपने हाथसे । ४ अपने पैरपर ।

## ३८. राग काफ़ी ।

मनहंस ! हमारी लै शिक्षा हितकारी ॥टेक॥  
 श्रीभगवानचरन पिंजरे वसि, तजि विषयनिकी  
 यारी ॥ मन० ॥ १ ॥ कुमति कागलीसौं मति  
 राचो, ना वह जात तिहारी । कीजै प्रीत सुमति  
 हंसीसौं, बुध हंसनकी प्यारी ॥ मन० ॥ २ ॥  
 काहेको सेवत भव झीलर, दुखजलपूरित  
 खारी । निज बल पंख पसारि उड़ो किन, हो  
 शिव सरवरचारी ॥ मन० ॥ ३ ॥ गुरुके वचन  
 विमल मोती चुन, क्यों निज वान विसारी ।  
 ह्वै ह्वै सुखी सीख सुधि राखें, भूधर भूलैं खारी  
 ॥ मन० ॥ ४ ॥

## ३९. राग रूपाल कान्हडी ।

एजी मोहि तारिये शान्तिजिनंद ॥ टेक ॥  
 तारिये तारिये अधम उधारिये, तुम करुनाके  
 कंद ॥ एजी० ॥ १ ॥ हथनापुर जनमें जग  
 जानैं, विश्वसेननृपनन्द ॥ एजी० ॥ २ ॥ धनि  
 ह माता ऐरादेवी, जिन जाये जगचंद ॥

१ झील । २ सरोवर-तालाबका रहनेवाला ।

एजी० ॥ ३ ॥ भूधर विनवै दूर करो प्रभु, सेव-  
कंके भवद्वद ॥ एजी० ॥ ४ ॥

४०. राग ख्याल ।

/ और सब थोथी बातें, भज लै श्रीभगवान ॥  
टेक ॥ प्रभु विन पालक कोई न तेरा, स्वारथ-  
मीत जहान ॥ और० ॥ १ ॥ परवनिता  
जननी सम गिननी, परधन जान पखान । इन्ह  
अमलों परमेसुर राजी, भाषें वेद पुरान ॥  
और० ॥ २ ॥ जिस उर अन्तर वसत निरन्तर,  
नारी औगुनखान । तहां कहां साहिवका वासा,  
दो खांडे इक म्यान ॥ और० ॥ ३ ॥ यह मत  
सतगुरुका उर धरना, करना कहिं न गुमान ।  
भूधर भजन न पलक विसरना, मरना मित्र  
निदान ॥ और० ॥ ४ ॥

४१. राग प्रभाती ।

। अजित जिन विनती हमारी मान जी, तुम  
लागे मेरे प्रान जी ॥ टेक ॥ तुम त्रिभुवनमें  
कल्प तरोवर, आस भरो भगवान जी ॥

अजित० ॥ १ ॥ वादि अनादि गयो भव.भ्रमत्तै,  
 भयो बहुत कुलकान जी । भाग सँजोग मिले  
 अब दीजे, मनवांछित वरदान जी ॥ अजित०  
 ॥ २ ॥ ना हम मांगै हाथी घोड़ा, ना कछु  
 संपति आन जी । भूधरके उर बसो जगतगुरु,  
 जबलौं पद निरवानजी ॥ अजित० ॥ ३ ॥

४२. राग धनासरी ।

सो मत सांचो है मन मेरे ॥ टेक ॥ जो  
 अनादि सर्वज्ञप्ररूपित, रागादिक विन जे रे ॥  
 सो मत० ॥ १ ॥ पुरुष प्रमान प्रमान वचन तिस,  
 कलपित जान अने रे । राग-दोष-दूषित तिन  
 वायक, सांचे हैं हित तेरे ॥ सो मत० ॥ २ ॥  
 देव अदोष धर्म हिंसा विन, लोभ विना गुरु वे  
 रे । आदि अन्त अविरोधी आगम, चार रतन  
 जहँ ये रे ॥ सो मत० ॥ ३ ॥ जगत भख्यो  
 पाखण्ड परख विन, खाइ खता बहुते रे । भूधर  
 करि निज सुबुधि कसौटी, धर्म कनक कसि ले  
 रे ॥ सो मत० ॥ ४ ॥

१४३

मेरे चारों शरन सहाई ॥ टेक ॥ जैसें जलधि  
परत वायसकों बोहिथ एक उपाई ॥ मेरे० ॥१॥  
प्रथम शरन, अरहन्त चरनकी, सुरनर पूजत  
पाई । दुतिय शरन श्रीसिद्धनकेरी, लोक-ति-  
लक-पुर-राई ॥ मेरे० ॥ २ ॥ तीजै सरन सर्व  
साधुनिकी, नगन दिगम्बर-कोई । चौथै धर्म  
अहिंसारूपी, सुरगमुकतिसुखदाई ॥ मेरे० ॥३॥  
दुरगति परत सुजन परिजनपै, जीव न राख्यो  
जाई । भूधर सत्य भरोसो इनको, ये ही लेहिं  
बचाई ॥ मेरे० ॥ ४ ॥

४४. राग सारंग ।

† जपि माला जिनवर नामकी ॥ टेक ॥ भजन  
सुधारससों नहिं धोई, सो रसना किस कामकी ॥  
जपि० ॥ १ ॥ सुमरन सार-और मिथ्या, पट-  
त्तर धूवा नामकी । विषम कमान समान विषय  
सुख, काय कोथली चामकी ॥ जपि० ॥ २ ॥  
जैसे चित्रनागके मांथै, थिर मूरति चित्रामकी ।

चित आरूढ़ करो प्रभु ऐसैं, खोय गुँड़ी परिना-  
मकी ॥ जपि० ॥ ३ ॥ कर्म वैरि अहनिशि छल  
जोवैं, सुधि न परत पल जामकी । भूधर कैसें  
बनत विसारैं, रटना पूरन रामकी ॥ जपि० ॥ ४ ॥

४५. राग मलार ।

वे मुनिवर कब मिलि हैं उपगारी ॥ टेक ॥  
साधु दिगम्बर नगन निरम्बर, संवरभूषण-  
धारी ॥ वे मुनि० ॥ १ ॥ कंचन काच बराबर  
जिनकै, ज्यों रिपु त्यों हितकारी ! महल मसान  
मरन अरु जीवन, सम गरिमा अरु गारी ॥ वे  
मुनि० ॥ २ ॥ सम्यग्ज्ञान प्रधान पवन बल, तप  
पावक परजारी । शोधत जीव सुवर्ण सदा जे,  
काय-कारिमा टारी ॥ वे मुनि० ॥ ३ ॥ जोरि  
जुगल कर भूधर विनवै, तिन पद ढोक हमारी ।  
भाग उदय दरसन जब पाऊं, ता दिनकी बलि-  
हारी ॥ मुनि० ॥ ४ ॥

४६. राग धमाल सारंग ।

होरी खेलौंगी, घर आये चिदानंद कन्त ॥

१ रातदिन । २ महिमा, बडाई । ३ गाली-१, ४ जलाई ।

टेक ॥ शिशिरं मिथ्यात गयो आई अब, कालकी लब्धि वसन्त ॥ होरी० ॥ १ ॥ पिय सँग खेलनको हम सखियो ! तरसीं काल अनन्त । भांग फिरे अब फाग रचानों, आयो विरहको अन्त ॥ होरी० ॥ २ ॥ सरधा गागरमें रुचिरूपी, केसर घोरि तुरन्त । आनँद नीर उमग पिचकारी, छोड़ो नीकी भन्त ॥ होरी० ॥ ३ ॥ आज वियोग कुमति सौतनिकै, मेरे हरप महन्त । भूधर धनि यह दिन दुर्लभ अति, सुमति सखी विहसन्त ॥ होरी० ॥ ४ ॥

४७. राग भैरौ ।

\*पारस-पद-नख-प्रकाश, अरुन वरन ऐसो ॥  
टेक ॥ मानों तप कुंजरके, सीसको सिंदूर पूर,  
राग दोष काननकों, दावानल जैसो ॥ पारस०  
॥ १ ॥ बोधमई प्रातकाल, ताको रवि उदय  
लाल, मोक्षवधू-कुचप्रलेप, कुंकुमाभ तैसो ॥

१ ठडी ऋतु । \* यह पद सिन्दूरप्रकरके पहले श्लोक ( सिन्दूरप्र-  
करस्तप करिशिर क्रोडे कषायाटवी ) की छाया है । २ लाल ।  
३ हाथीके । ४ वनको ।

३ भाग ३



पारस० ॥ २ ॥ कुशलवृक्ष दल उलास, इहि  
विधि बहु गुणनिवास, भूधरकी भरहु आस,  
दीन दासके सो ॥ पारस० ॥ ३ ॥

४८. राग धनासरी ।

शेष सुरेश नरेश रटै तोहि, पार न कोई पावै  
जू ॥ टेक ॥ काँपै नपत वंयोम विलसतसौं, को  
तारे गिन लावै जू ॥ शेष० ॥ १ ॥ कौन सु-  
जान मेघ बूदनकी, संख्या समुझि सुनावै जू ॥  
शेष० ॥ २ ॥ भूधर सुजस गीत संपूरन, गन-  
पति भी नहिं गावै जू ॥ शेष० ॥ ३ ॥

४९. राग रामकली ।

आदि पुरुष मेरी आस भरो जी । औगुन  
मेरे माफ करो जी ॥ टेक ॥ दीनदयाल विरद  
विसरो जी, कै विनती मोरी श्रवण धरो जी ॥१॥  
काल अनादि वस्यो जगमाहीं, तुमसे जगपति  
जानै नाहीं । पाँय न पूजे अन्तरजामी, यह  
अपराध क्षमा कर स्वामी ॥ आदि० ॥ २ ॥  
भक्ति प्रसाद परम पद है है, बंधी बंध दशा

१ किससे । २ आकाश । ३ विलस्तसे । ४ गणधर ।

मिट जै है । तव न करों तेरी फिर पूजा, यह  
अपराध खमों प्रभु दूजा ॥ आदि० ॥ ३ ॥  
भूधर दोष किया वकसावै, अरु आगेकौ लारे  
लावै । देखो सेवककी ढिठवाई, गरुवे साहिबसों  
वनियाई ॥ आदि० ॥ ४ ॥

५०. राग ख्याल काफी कानडी ।

तुम सुनियो साधो!, मनुवा मेरा ज्ञानी ।  
सत गुरु भैंटा संसा मैटा, यह नीकै करि जानी ॥  
टेक ॥ चेतनरूप अनूप हमारा, और उपाधि  
विरानी ॥ तुम सुनियो० ॥ १ ॥ पुदगल भांडा  
आतम खांडा, यह हिरदै ठहरानी । छीजौ भीजौ  
कृत्रिम काया, में निरभय निरवानी ॥ तुम  
सुनियो० ॥ २ ॥ मैं ही देखों मैं ही जानों, मेरी  
होय निशानी । शवद फरस रस गंध न धारों,  
ये वातैं विज्ञानी ॥ तुम सुनियो० ॥ ३ ॥ जो  
हम चीन्हां सो थिर कीन्हां, हुए सुदृढ़ सर-  
धानी । भूधर अव कैसें उतरैगा, खड़ग चढ़ा  
जो पानी ॥ तुम सुनियो० ॥ ४ ॥

१ माफ कराता है । २ ढीठता । ३ वनियांपन । ४ संदेह ।

## ५१. राग काफ़ी ।

प्रभु गुन गाय रे, यह औसर फेर न पाय रे ॥  
 टेक ॥ मानुष भव जोग दुहेला, दुर्लभ सतसंगाति  
 मेला । सब वात भली वन आई, अरहन्त भजौ  
 रे भाई ॥ प्रभु० ॥ १ ॥ पहलें चित-चीरँ सँभारो,  
 कामादिक मैल उतारो । फिर प्रीति फिटकरी  
 दीजे, तव सुमरन रंग रँगीजे ॥ प्रभु० ॥ २ ॥  
 धन जोर भरा जो कूवा, परवार वढें क्या हूवा ।  
 हाथी चढि क्या कर लीया, प्रभु नाम विनां धिक  
 जीया ॥ प्रभु० ॥ ३ ॥ यह शिक्षा है व्यवहारी,  
 निहचैकी साधनहारी । भूधर पैड़ी पग धरिये,  
 तव चढ़नेको चित करिये ॥ प्रभु० ॥ ४ ॥

## ५२. राग हागीर कल्याण ।

सुनि सुजान ! पाँचों रिपु वश करि, सुहित  
 करन असमर्थ अवश करि ॥ टेक ॥ जैसेँ जड़  
 खखौरको कीड़ा, सुहित सम्हाल सकें नहिँ फँस  
 करि ॥ सुनि० ॥ १ ॥ पाँचनको मुखिया मन  
 चंचल, पहले ताहि पकर रस (?) कस करि । समझ

देखि नायकके जीतैं, जै है भाजि सहज सब  
लसकरि ॥ सुनि० ॥ २ ॥ इंद्रियलीन जनम  
सब खोयो, वाकी चल्यो जात है खस करि ।  
भूधर सीख मान सतगुरुकी, इनसों प्रीति तोरि  
अव वश करि ॥ सुनि० ॥ ३ ॥

५३. राग गौरी ।

देखो भाई ! आत्मदेव विराजै ॥ टेक ॥  
इसही हूँठ हाथ देवलमें, केवलरूपी राजै ॥  
देखो० ॥ १ ॥ अमल उजास जोतिमय जाकी,  
मुद्रा मंजुल छाजै । मुनिजनपूज अचल अवि-  
नाशी, गुण वरनत बुधि लाजै ॥ देखो० ॥ २ ॥  
परसंजोग समल प्रतिभासत, निज गुण मूल न  
त्याजै । जैसे फटिक पखान हेतसों, श्याम अरुन  
दुति साजै ॥ देखो० ॥ ३ ॥ 'सोऽहं' पद सम-  
तासों ध्यावत, घटहीमें प्रभु पाजै । भूधर निकट  
निवास जासुको, गुरु विन भरम न भाजै ॥  
देखो० ॥ ४ ॥

## ५४. राग ख्याल ।

अब नित नेमि नाम भजौ ॥ टेक ॥ सच्चा  
साहिब यह निज जानौ, और अदेव तजौ ॥ अब०  
॥ १ ॥ चंचल चित्त चरन थिर राखो, विषयनतैं  
वरजौ ॥ अब० ॥ २ ॥ आननतैं गुन गाय निर-  
न्तर, पाननं पांय जैजौ ॥ अब० ॥ ३ ॥ भूधर जो  
भवसागर तिरना, भक्ति जहाज सजौ ॥ अब० ॥ ४ ॥

## ५५. राग श्रीगौरी ।

(“ माया काली नागिनि जिनं ढसिया सब संसार हो ” यह चाल । )

काया गागरि जोजरी, तुम देखो चतुर वि-  
चार हो ॥ टेक ॥ जैसें कुल्हिया कांचकी, जाके  
विनसत नाहीं बार हो ॥ काया० ॥ १ ॥ मांस-  
मयी माटी लई अरु, सानी रुधिर लगाय हो ।  
कीन्हीं करम कुम्हारने, जासों काहूकी न वसाय  
हो ॥ काया० ॥ २ ॥ और कथा याकी सुनौं,  
यामैं अध उरध दश ठेह हो । जीव सलिल तहां  
थंभ रह्यौ भाई, अद्भुत अचरज येह हो ॥

१ मुखसे । २ हाथ जोडकर । ३ नमन करो । ४ जरजरित, दूटी

काया० ॥ ३ ॥ यासौं ममत निवारकैं, नित  
रहिये प्रभु अनुकूल हो । भूधर ऐसे ख्यालका  
भाई, पलक भरोसा भूल हो ॥ काया० ॥ ४ ॥

५६. राग ख्याल बरवा ।

( “ देखनेको आई लाल मै तो तेरे देखनेको आई ” यह चाल । )

मैं तो थाकी आज महिमा जानी ॥ टेक ॥  
अब लों नहिं उर आनी ॥ मैं तो० ॥ १ ॥  
काहेंको भव वनमें भ्रमते, क्यों होते दुखदानी ॥  
मैं तो० ॥ २ ॥ नामप्रताप तिरे अंजनसे,  
कीचकसे अभिमानी ॥ मैं तो० ॥ ३ ॥ ऐसी  
साख बहुत सुनियत है, जैनपुराण बखानी ॥  
मैं तो० ॥ ४ ॥ भूधरको सेवा वर दीजे, मैं  
जांचक तुम दानी ॥ मैं तो० ॥ ५ ॥

५७. राग विहाग ।

अरे मन चल रे, श्रीहथनापुरकी जात ॥  
टेक ॥ रामा रामा धन धन करते, जावै जनम  
विफल रे ॥ अरे० ॥ १ ॥ करि तीरथ जप तप  
जिनपूजा, लालच वैरी दल रे ॥ अरे० ॥ २ ॥

शांति कुंथु अर तीनों जिनका, चारु कल्याण-  
 कथल रे ॥ अरे० ॥ ३ ॥ जा दरसत परसत  
 सुख उपजत, जाहिं सकल अघ गल रे ॥ अरे०  
 ॥४॥ देश दिशन्तरके जन आवैं, गावैं जिन गुन  
 रल रे ॥ अरे० ॥ ५ ॥ तीरथ गमन सहामी  
 मेला, एक पंथ द्वै फल रे ॥ अरे० ॥ ६ ॥  
 कायाके संग काल फिरै है, तन छायाके छल  
 रे ॥ अरे० ॥ ७ ॥ माया मोह जाल बंधनसौं,  
 भूधर वेगि निकल रे ॥ अरे० ॥ ८ ॥

५८.-राग विहाग ।

जगत जन जूवा हारि चले ॥ टेक ॥ काम  
 कुटिल सँग बाजी माँड़ी, उन करि कपट छले ॥  
 जगत० ॥ १ ॥ चार कषायमयी जहँ चौपरि,  
 पांसे जोग रले । इत सरवस उत कामिनी  
 कौड़ी, इह विधि झटक चले । जगत० ॥ २ ॥  
 क्रूर खिलार विचार न कीन्हों, ह्वै हैं ख्वार  
 भले । विनां विवेक मनोरथ काके, भूधर सफल  
 ॥ जगत० ॥ ३ ॥

५९. राग विहाग ।

तहां लै चल री ! जहां जादौपति प्यारो ॥  
 टेक ॥ नेमि निशाकर विन यह चन्दा, तन मन  
 दहत सकल री । तहां० ॥ १ ॥ किरन किधौ  
 नाविक-शर-तति कै, ज्यों पावककी झल री ।  
 तारे हैं कि अँगारे सजनी, रजनी राकसदल  
 री । तहां० ॥ २ ॥ इह विधि राजुल राजकुमारी,  
 विरह तपी वेकल री । भूधर धन्न शिवांसुत  
 चादर, वरसायो समजल री । तहां० ॥ ३ ॥

६०. राग खगाल ।

अरे ! हां चेतो रे भाई ॥ टेक ॥ मानुष देह  
 लही दुलही, सुघरी उघरी सतसंगति पाई ।  
 अरे हां० ॥ १ ॥ जे करनी वरनी करनी नहिं,  
 ते समझी करनी समझाई । अरे हां० ॥ २ ॥ यों  
 शुभ थान जग्यो उर ज्ञान, विषैविषपान तृषा  
 न बुझाई । अरे हां० ॥ ३ ॥ पारस पाय सुधा-

१ राक्षस । २ शिवादेवीके पुत्र नेमि । ३ वाडल-मेघ । ४ शम-  
 समतारूपी जल । ५ टेक छोड़कर पढ़नेसे इस पदका एक मत्तगयन्द  
 ( तेईसा ) संवैया बन जाता है ।



रस भूधर, भीखकेमाहिं सुलाज न आई ।  
अरे हां० ॥ ४ ॥

६१. राग सोरठ ।

सो गुरुदेव हमारा है साधो ॥ टेक ॥ जोग  
अगनिमें जो थिर राखै, यह चित चंचल पारा  
है ॥ सो गुरु० ॥ १ ॥ करै न कुरंग खरे मद्-  
माते, जप तप खेत उजारा है । संजम डोर  
जोर वश कीने, ऐसा ज्ञान विचारा है ॥ सो  
गुरु० ॥ २ ॥ जा लक्ष्मीको सब जग चाहै,  
दास हुआ जग सारा है । सो प्रभुके चरननकी  
चेरी, देखो अचरज भारा है ॥ सो गुरु० ॥ ३ ॥  
लोभ सरपके कहर जहरकी, लहर गई दुख  
टारा है । भूधर ता रिखैका शिख हूजे, तब  
कछु होय सुधारा है ॥ सो गुरु० ॥ ४ ॥

६२. राग सोरठ ।

स्वामीजी सांची सरन तुम्हारी ॥ टेक ॥  
समरथ शांत सकल गुनपूरे, भयो भरोसो  
भारी ॥ स्वामी० ॥ १ ॥ जनम जरा जग बैरी

१ इन्द्रिय । २ उजाडा, नष्ट किया । ३ ऋषि-मुनिका । ४ शिष्य ।

जीते, टेव मरनकी टारी । हमहूको अजरामर  
करियो, भरियो आस हमारी ॥ स्वामी० ॥ २ ॥  
जनमें मरै धरै तन फिरि फिरि, सो साहिव  
संसारी । भूधर परदालिद क्यों दलि है, जो है  
आप भिखारी ॥ स्वामी० ॥ ३ ॥

६३.

जीवदया व्रत तरु वड़ो, पालो पालो वड़-  
भाग ॥ टेक ॥ कीड़ी कुंजर कुंथुवा, जेते जग-  
जन्त । आप सरीखे देखिये, करिये नहिं भन्तं ॥  
जीवदया० ॥ १ ॥ जैसे अपने हीर्यडे, प्यारे  
निज प्रान । ल्यों सवहीकों लाड़िये, निहचै यह  
जान ॥ जीवदया० ॥ २ ॥ फांस चुभै टुक  
देहमें, कछु नाहिं सुहाय । ल्यों परदुखकी वे-  
दना, समझो मन लाय ॥ जीवदया० ॥ ३ ॥  
मन वचसौं अर कायसौं, करिये परकाज ।  
किसहीकों न सताइये, सिखवैं रिखिराज ॥ जीव-  
दया० ॥ ४ ॥ करुना जगकी मायँडी, धीजै  
सव कोय । धिग ! धिग ! निरदय भावना, कर्पै-

जिय जोय ॥ जीवदया० ॥ ५ ॥ सब दर्शन  
 सब लोयमें, सब कालमँझार । यह करनी बहु  
 शंसिये, ऐसो गुणसार ॥ जीवदया० ॥ ६ ॥  
 निरदै नर भी संस्तुवै, निदै कोइ नाहिं ॥ पालैं  
 विरले साहसी, धनि वे जगमाहिं ॥ जीवदया०  
 ॥ ७ ॥ पर सुखसौं सुख होय, पर-पीड़ासौं पीर ।  
 भूधर जो चित चाहिये, सोई कर बीर ! ॥  
 जीवदया० ॥ ८ ॥

६४.

ऐसो श्रावक कुल तुम पाय, वृथा क्यों  
 खोवत हो ॥ टेक ॥ कठिन कठिनकर नरभव  
 पाई, तुम लेखी आसान । धर्म विसारि विषयमें  
 राचौ, मानी न गुरुकी आन ॥ वृथा० ॥ १ ॥  
 चक्री एक मतंगज पायो, तापर ईधन ढोयो ।  
 विना विवेक विना मतिहीको, पाय सुधा पग  
 धोयो ॥ वृथा० ॥ २ ॥ काहू शठ चिन्तामणि  
 पायो, मरम न जानो ताय । वायस देखि उद-  
 धिमें फैक्यो, फिर पीछे पळताय ॥ वृथा० ॥ ३ ॥

१ दर्शनमें-धर्ममें । २ लोकमें । ३ सराहिए । ४ स्तुति करे ।

सात विसन आठों मद त्यागो, करुना चित्त  
विचारो । तीन रतन हिरदैमें धारो, आवागमन  
निवारो ॥ वृथा० ॥ ४ ॥ भूधरदास कहत  
भविजनसों. चेतन अव तो सम्हारो । प्रभुको  
नाम तरन तारन जपि, कर्मफन्द निरवारो ॥  
वृथा० ॥ ५ ॥

६५. राग ख्याल ।

नैननिको वान परी, दरसनकी ॥ टेक ॥  
जिनमुखचन्द चकोर चित्त मुझ, ऐसी प्रीति  
करी ॥ नैन० ॥ १ ॥ और अदेवनके चितवनको  
अव चित चाह टरी । ज्यों सव धूलि दवै  
दिशि दिशिकी, लागत मेघझरी ॥ नैन० ॥ २ ॥  
छवी समाय रही लोचनमें, विसरत नाहिं  
घरी । भूधर कह यह टेव रहो थिर, जनम  
जनम हमरी ॥ नैन० ॥ ३ ॥

६६. चाल गोपीचन्दकी ।

यह तन जंगम रूखड़ा, सुनियो भवि प्रानी ।  
एक वृन्द इस वीच है, कछु वात न छांनी ॥ टेक ॥

गरभ खेतमें मास नौ, निजरूप दुराया । बाल  
 अंकुरा बढ़ गया, तब नजरोँ आया ॥ १ ॥  
 अस्थिरसा भीतर भया, जानै सब कोई । चाम  
 त्वचा ऊपर चढ़ी, देखो सब लोई ॥ २ ॥ अधो  
 अंग जिस पेड़ है, लख लेहु सयाना । भुज शाखा  
 दल आँगुरी, दृग फूल रँवाँना ॥ ३ ॥ वनिता  
 बेलि सुहावनी, आलिंगन कीया । पुत्रादिक पंछी  
 तहां, उड़ि बासा लिया ॥ ४ ॥ निरख विरँख बहु  
 सोहना, सबके मनमाना । स्वजन लोग छाया  
 तकी, निज स्वारथ जाना ॥ ५ ॥ काम भोग  
 फलसों फला, मन देखि लुभाया । चाखतके  
 मीठे लगे, पीछें पछताया ॥ ६ ॥ जरादि बलसों  
 छबि घटी, किसही न सुहाया । काल अगनि  
 जब लहलही, तब खोज न पाया ॥ ७ ॥ यह  
 मानुष डुमकी दशा, हिरदै धरि लीजे । ज्यों  
 हूवा त्यों जाय है, कछु जतन करीजे ॥ ८ ॥ धर्म  
 सलिलसों सींचिकै, तप धूप दिखइये । सुरग  
 २ फल तब लगै, भूधर सुख पइये ॥ ९ ॥

६७. कालिंगडा ।

( “ गर्गत्र जुलाहा ताना कौन बुनेगा ” इस चालमे । )

चरखा चलता नहीं, चरखा हुआ पुराना ॥  
 टेक ॥ पग खूटे दो हालन लागे, उर मदरा  
 खखराना । छीदी हुई पांखड़ी-पांसू, फिरै नहीं  
 मनमाना ॥ चरखा० ॥ १ ॥ रसना तकलीने  
 बल खाया, सो अब कैसें खूटै ॥ शवद सूत सूधा  
 नहीं निकसे, घड़ी घड़ी पल टूटै ॥ चरखा०  
 ॥ २ ॥ आयु मालका नहीं भरोसा, अंग चला-  
 चल सारे ! रोज इलाज मरम्मत चाहै, वैद  
 वाढ़ही हारे ॥ चरखा० ॥ ३ ॥ नया चरखला  
 रंगा चंगा, मक्का चित्त चुरावै । पलटा वरन  
 गये गुन अगले, अब देखैं नहीं भावै ॥ चरखा०  
 ॥ ४ ॥ मौटा महीं कातकर भाई !, कर अपना  
 सुरझेरा ॥ अंत आगमें ईधन होगा, भूधर  
 समझ सवेरा ॥ चरखा० ॥ ५ ॥

६८. आरती ।

आरती आदि जिनिंद तुम्हारी, नाभिकुमार  
 कनकछविधारी ॥ आरती० ॥ टेक ॥ जुगकी

आदि प्रजा प्रतिपाली, सकल जननकी आरति  
 टाली ॥ आरती० ॥ १ ॥ वांछापूरन सबके  
 स्वामी, प्रगट भये प्रभु अंतरजामी ॥ आरती०  
 ॥ २ ॥ कोटभानुजुत आभा तनकी, चाहत  
 चाह मिटै नहिं तनकी ॥ आरती० ॥ ३ ॥  
 नाटक निरखि परम पद ध्यायो, राग धान  
 वैराग उपायो ॥ आरती० ॥ ४ ॥ आदि जग-  
 तगुरु आदि विधाता, सुरग मुक्ति मार-  
 गके दाता ॥ आरती० ॥ ५ ॥ दीनदयाल  
 दया अब कीजे, भूधर सेवकको ढिग लीजे ॥  
 आरती० ॥ ६ ॥

६९. राग सलहामारु ।

सुनि सुनि हे साथनि ! म्हारे मनकी बात ।  
 सुरति सखीसों सुमति राणी यों कहै जी ।  
 बीत्यो है साथनि म्हारी ! दीरघकाल, म्हारो  
 सनेही म्हारे घर ना रहै जी ॥ १ ॥ ना वरज्यो  
 रहै साथनि म्हारी चेतनराव, कारज अधम  
 अचेतनके करै जी । दुरमति है साथनि  
 म्हारी जात कुजात, सोई चिदातम पियको

चित्त हरै जी ॥ २ ॥ सिखयौ है साथनि म्हारी  
 केती वार, क्यों हीं कियो हठी हठ एरी हरै  
 जी । कीजे हो साथनि म्हारी कौन उपाय,  
 अब यह विरह विथा नहिं सही परै जी ॥ ३ ॥  
 चलि चलि री साथनि म्हारी, जिनजीके पास,  
 वे उपगारी इसैं समझावसी जी । जगसी हे  
 सखी म्हारे मस्तक भाग, जो म्हारौ कंथ  
 समझि घर आवसी जी ॥ ४ ॥ कारज हे सखी  
 म्हारी ! सिद्ध न होय, जव लग काललवधि-  
 वल नहिं भलो जी । तो पण हे सखी म्हारी  
 उद्यम जोग, सीख सयानी भूधर मन  
 सांभलो जी ॥ ५ ॥

७०. जकड़ी ।

अब मन मेरे वे !, सुनि सुनि सीख सयानी ।  
 जिनवर चरना वे !, करि करि प्रीति सुज्ञानी ॥  
 करि प्रीति सुज्ञानी ! शिवसुखदानी, धन जीतव  
 है पंचदिना । कोटि वरप जीवौ किस लेखे, जिन  
 चरणांबुजभक्ति विना ॥ नर परजाय पाय अति  
 उत्तम, गृह वसि यह लाहा ले रे ! । समझ समझ



वोलैं गुरुज्ञानी, सिख सयानी मन मेरे ॥ १ ॥  
 तू मति तरसै वे !, सम्पति देखि पराई । बोये  
 लुनि ले वे !, जो निज पूर्व कमाई ॥ पूर्व कमाई  
 सम्पति पाई, देखि देखि मति झूर मरै । बोय  
 बँबूल शूल-तरु भौंदू !, अमनकी क्या आस  
 करै ॥ अब कछु समझ बूझ नर तासों, ज्यों  
 फिर परभव सुख दरसै । करि निजध्यान दान  
 तप संजम, देखि विभव पर मत तरसै ॥ २ ॥  
 जो जग दीसै वे !, सुंदर अरु सुखंदाई । सो सब  
 फलिया वे !, धरमकल्पद्रुम भाई ! ॥ सो सब धर्म  
 कल्पद्रुमके फल, रथ पायक बहु ऋद्धि सही ।  
 तेज तुरंग तुंग गज नौ निधि, चौदह रतन  
 छखण्ड मही ॥ रति उनहार रूपकी सीमा, सहस  
 छ्यानवै नारि वरै । सो सब जानि धर्मफल भाई !  
 जो जग सुंदर दृष्टि परै ॥ ३ ॥ लगैं असुंदर वे !,  
 कंटक वान घनेरे । ते रस फलिया वे !, पाप  
 कनक-तरु केरे ॥ ते सब पाप कनकतरुके फल,  
 सोग दुख नित्य नये । कुथित शरीर  
 चीर नहीं तापर, घर घर फिरत फकीर भये ॥

भूख प्यास पीड़ें कन मांगें, होत अनादर पग  
 पगमें । ये परतच्छ पाप संचित फल, लगेँ  
 असुंदर जे जगमें ॥ ४ ॥ इस भव वनमें वे !,  
 ये दोऊ तरु जाने । जो मन माने वे !, सोई  
 मीचि सयाने ॥ सीचि सयाने ! जो मन माने,  
 वेर वेर अब कौन कहै । तू करतार तुही फल-  
 भोगी, अपने सुख दुख आप लहै ॥ धन्य !  
 धन्य ! जिन मारग सुंदर, सेवन जोग तिहूँ  
 पनमें । जासों समुझि परे सब भूधर, सदा  
 शरण इस भववनमें ॥ ५ ॥

७१. विनती ।

हर्गितीकिका ।

पुलकन्त नयन चकोर पक्षी, हँसत उर इन्दी-  
 वरो । दुर्बुद्धि चकवी विलख विञ्जुरी, निविड  
 मिथ्यातम हरो ॥ आनन्द अम्बुज उमग उछ-  
 स्यो, अखिल आतम निरदले । जिनवदन पूर-  
 नचन्द्र निरखत, सकल मनवांछित फले ॥ १ ॥  
 सुन्न आज आतम भयो पावन, आज विघ्न  
 विनाशियो । संसारसागर नीर निवट्यो, अखिल

तत्त्व प्रकाशियो ॥ अब भई कमला किंकरी  
 मुझ, उभय भव निर्मल ठये । दुख जरो दुर्गति-  
 वास निवरो, आज नव मंगल भये ॥ २ ॥  
 मनहरन मूरति हेरि प्रभुकी, कौन उपमा लाइये ।  
 मम सकल तनके रोम हुलसे, हर्ष ओर न पा-  
 इये ॥ कल्याणकाल प्रतच्छ प्रभुको, लखें जो  
 सुर नर घने । तिस समयकी आनन्दमहिमा,  
 कहत क्यों मुखसों बने ॥३॥ भर नयन निरखे  
 नाथ तुमको, और वांछा ना रही । मन ठठ  
 मनोरथ भये पूरन, रंक मानो निधि लही ॥  
 अब होय भव भव भक्ति तुम्हरी, कृपा ऐसी  
 कीजिये । कर जोर 'भूधरदास' विनवै, यही  
 वर मोहि दीजिये ॥ ४ ॥

७२. विनती ।

तुम तरनतारन भवनिवारन, भविक-मनआ-  
 नन्दनो । श्रीनाभिनन्दन जगतवन्दन, आदि-  
 नाथ जिनिन्दनो ॥ तुम आदिनाथ अनादि  
 सेऊं, सेय पद पूजा करों । कैलाशगिरिपर  
 ऋषभ जिनवर, चरणकमल हृदय धरों ॥ १ ॥

तुम अजितनाथ अजीत जीते, अष्टकर्म महा-  
वली । यह जानकर तुम शरण आयो, कृपा  
कीजे नाथ जी ॥ तुम चन्द्रवदन सुचन्द्रलक्षण,  
चन्द्रपुरिपरमेशजू । महासेननन्दन जगतवन्दन,  
चन्द्रनाथ जिनेशजू ॥ २ ॥ तुम वालवोध-  
विवेकसागर, भव्यकमलप्रकाशनो । श्रीनेमि-  
नाथ पवित्र दिनकर, पापतिमिर विनाशनो ॥  
तुम तजी राजुल राजकन्या, कामसेन्या वश  
करी । चारित्ररथ चढ़ि भये दूलह, जाय शिव-  
सुन्दरि वरी ॥ ३ ॥ इन्द्रादि जन्मस्थान जि-  
नके, करन कनकाचल चढे । गंधर्व देवन सु-  
यज्ञ गाये, अपसरा मंगल पढे ॥ इहि विधि  
सुरासुर निज नियोगी, सकल सेवाविधि ठही ।  
ते पार्श्व प्रभु मो आस पूरो, चरनसेवक हों सही  
॥ ४ ॥ तुम ज्ञान रवि अज्ञानतमहर, सेवकन  
सुख देत हो । मम कुमतिहारन सुमतिकारन,  
दुरित सब हर लेत हो ॥ तुम मोक्षदाता  
कर्मघाता, दीन जानि दया करो । सिद्धार्थ-  
वन्दन जगतवन्दन, महावीर जिनेश्वरो ॥ ५ ॥

चौबीस तीर्थकर सुजिनको, नमत सुरनर आ-  
 यके । मैं शरण आयो हर्ष पायो, जोर कर सिर  
 नायके ॥ तुम तरनतारन हो प्रभूजी, मोहि  
 पार उतारियो । मैं हीन दीन दयालु प्रभुजी,  
 काज मेरो सारियो ॥ ६ ॥ यह अतुलमहिमा-  
 सिन्धु साहब, शक्र पार न पावही । तजि हासभय  
 तुम दास भूधर, भक्तिवश यश गावही ॥ ७ ॥

७३. गुरुविनती ।

बन्दौं दिगम्बरगुरुचरन, जग तरन तारन  
 जान । जे भरम भारी रोगको, हैं राजवैद्य  
 महान ॥ जिनके अनुग्रह विन कभी, नहिं कटें  
 कर्म जँजीर । ते साधु मेरे मन वसो, मेरी हरो  
 पातक पीर ॥ १ ॥ यह तन अपावन अशुचि  
 है, संसार सकल असार । ये भोग विष पकवा-  
 नसे, इस भाँति सोच विचार ॥ तप विरचि श्री-  
 मुनि वन वसे, सब त्यागि परिग्रह भीर । ते साधु  
 मेरे मन वसो, मेरी हरो पातक पीर ॥ २ ॥ जे  
 काच कंचन सम गिनै, अरि मित्र एक सरूप ।

निंदा बड़ाई सारिखी, वनखण्ड शहर अनूप ॥  
 सुख दुःख जीवन मरनमें, नहीं खुशी नहीं दि-  
 लगीर । ते साधु मेरे मन वसो, मेरी हरो पातक  
 पीर ॥ ३ ॥ जे वाह्य परवत वन वसैं, गिरि गुहां  
 महल मनोग । सिल सेज समता सहचरी, शशि-  
 किरण दीपक जोग ॥ मृग मित्र भोजन तपमई,  
 विज्ञान निरमल नीर । ते साधु मेरे मन वसो,  
 मेरी हरो पातक पीर ॥ ४ ॥ सुखें सरोवर जल  
 भरे, सूखै तरंगनितोय । बाँटें बटोही ना चलैं,  
 जहां घाम गरमी होय ॥ तिस काल मुनिवर तप  
 तपैं, गिरिशिखर ठाड़े धीर । ते साधु मेरे मन  
 वसो, मेरी हरो पातक पीर ॥ ५ ॥ घन घोर गरजैं  
 घनघटा, जल परै पावँसकाल । चहुँ ओर चमकै  
 बीजुरी, अति चलै शीतल व्याँल ॥ तरुहेट तिष्ठैं  
 तव जती, एकान्त अचल शरीर । ते साधु मेरे  
 मन वसो, मेरी हरो पातक पीर ॥ ६ ॥ जव-  
 शीत मास तुषारसों, दाहै सकल वनराय । जव

१ समान, बगवर । २ नदीका जल । ३ रास्तेसे । ४ मुसाफिर ।  
 ५ बरसातमें । ६ पवन । ७ वृक्षके नीचे ।

जमै पानी पोखरां, थरहरै सबकी काय ॥ तव  
 नगन निवसैं चौहटैं, अथवा नदीके तीर । ते  
 साधु मेरे मन वसो, मेरी हरो पातक पीर ॥ ७ ॥  
 कर जोर भूधर बीनवै, कब मिलैं वह मुनिराज ।  
 यह आस मनकी कब फलै, मेरे सैं सँगरे काज ॥  
 संसार विषम विदेशमें, जे विना कारण वीर । ते  
 साधु मेरे मन वसो, मेरी हरो पातक पीर ॥ ८ ॥

७४. विनती ।

( चौपाई १६ मात्रा । )

जै जगपूज परमगुरु नामी, पतित उधारन  
 अंतरजामी । दास दुखी तुम अति उपगारी,  
 सुनिये प्रभु ! अरदास हमारी ॥ १ ॥ यह भव घोर  
 समुद्र महा है, भूधर भ्रम-जल-पूर रहा है । अंतर  
 दुख दुःसह बहुतेरे, ते बड़वानल साहिव मेरे  
 ॥ २ ॥ जनम जरा गद मरन जहां है, ये ही प्रबल  
 तरंग तहां है । आवत विपति नदीगन जामें, मोह  
 महान मगर इक तामें ॥ ३ ॥ तिस मुख जीव पखो  
 दुख पावै, हे जिन ! तुम विन कौन छुड़ावै ।

१ चौपटमैदान । २ सिद्ध होवें । ३ सब ।

अशरन-शरन अनुग्रह कीजे, यह दुख मेदि  
 सुकति मुझ दीजे ॥ ४ ॥ दीरघ काल गयो  
 विललावैं, अव ये सूल सहे नहिं जावैं । सुनि-  
 यत यों जिनशासनमाहीं, पंचम काल परमपद  
 नाहीं ॥ ५ ॥ कारन पांच मिलैं जव सारे, तब  
 शिव सेवक जाहिं तुम्हारे । तातैं यह विनती  
 अव मेरी, स्वामी ! शरण लई हम तेरी ॥ ६ ॥  
 प्रभु आगैं चितचाह प्रकासों, भव भव श्रावक  
 कुल अभिलासों । भव भव जिन आगम अव-  
 गाहों, भव भव भक्ति शरणकी चाहों ॥ ७ ॥ भव  
 भवमें सत संगति पाऊं, भव भव साधनके गुन  
 गाऊं । परनिंदा मुख भूलि न भाखूं, मैत्रीभाव  
 सबनसों राखूं ॥ ८ ॥ भव भव अनुभव आत्मकेरा,  
 होहु समाधिमरण नित मेरा । जवलों जनम  
 जगतमें लाधों, काललवधि वल लहि शिव साधौ  
 ॥ ९ ॥ तवलों ये प्रापति मुझ हूजौ, भक्ति प्रताप  
 मनोरथ पूजौ । प्रभु सब समरथ हम यह लोरैं,  
 भूधर अरज करत कर जोरैं ॥ १० ॥



७५. नेमिनाथजीकी विनती ।

त्रिभुवनगुरु स्वामी जी, करुनानिधि नामी  
 जी । सुनि अंतरजामी, मेरी वीनती जी ॥ १ ॥  
 मैं दास तुम्हारा जी, दुखिया बहु भारा जी ! दुख  
 भेटनहारा, तुम जादोंपती जी ॥ २ ॥ भरम्यो  
 संसारा जी, चिर विपति-भँडारा जी । कहिं सार  
 न सारे, चहुँगति डोलियो जी ॥ ३ ॥ दुख मेरु  
 समाना जी, सुख सरसों-दाना जी । अब जान  
 धरि ज्ञान, तराजू तोलिया जी ॥ ४ ॥ थावर  
 तन पाया जी, त्रस नाम धराया जी । कृमि कुंथु  
 कहाया, मरि भँकरा हुवा जी ॥ ५ ॥ पशुकाया  
 सारी जी, नाना विधि धारी जी । जलचारी  
 थलचारी, उड़न पखेरु हुवा जी ॥ ६ ॥ नरक-  
 नकेमाहीं जी, दुख ओर न काहीं जी । अति  
 घोर जहाँ है, सरिता खारकी जी ॥ ७ ॥ पुनि  
 असुर संघारैं जी, निज वैर विचारैं जी । मिलि  
 बांधैं अर मारैं, निरदय नारकी जी ॥ ८ ॥ मा-  
 नुष अवतारैं जी, रह्यो गरभमँझारैं जी । रंदि  
 जनमत, वारैं मैं घनों जी ॥ ९ ॥ जो-

वन तन रोगी जी, कै विरहवियोगी जी । फिर  
 भोगी बहुविधि, विरघपनाकी वेदना जी ॥१०॥  
 सुरपदवी पाई जी, रंभा उर लाई जी । तहाँ  
 देखि पराई, संपति झूरियो जी ॥ ११ ॥ माला  
 मुरझानी जी, तव आरति ठानी जी । तिथि  
 पूरन जानी, मरत विसूरियो जी ॥ १२ ॥ यों  
 दुख भवकेरा जी, भुगतो बहुतेरा जी । प्रभु !  
 मेरे कहतै, पार न है कहीं जी ॥ १३ ॥ मि-  
 थ्यामदमाता जी, चाही नित साता जी । सुख-  
 दाता जगत्राता, तुम जाने नहीं जी ॥ १४ ॥  
 प्रभु भागनि पाये जी, गुन श्रवन सुहाये जी ।  
 तकि आयो अव सेवककी, विपदा हरो जी  
 ॥ १५ ॥ भववास वसेरा जी, फिरि होय न  
 मेरा जी । सुख पावै जन तेरा, स्वामी ! सो  
 करो जी ॥ १६ ॥ तुम शरनसहाई जी, तुम  
 सज्जनभाई जी । तुम माई तुम्हीं वाप, दया  
 मुझ लीजिये जी ॥ १७ ॥ भूधर कर जौरै जी,  
 ठाड़ो प्रभु औरै जी । निजदास निहारो, निर-  
 भय कीजिये जी ॥ १८ ॥

।७६. विनती ।

( ढाल परमाद्री । )

अहो ! जगतगुरु एक, सुनियो अरज ह-  
 मारी । तुम हो दीन दयाल, मैं दुखिया संसारी  
 ॥ १ ॥ इस भव वनमें वादि, काल अनादि  
 गमायो । भ्रमत चहुँगतिमाहिं, सुख नहीं दुख  
 बहु पायो ॥ २ ॥ कर्म महारिपु जोर, एक न  
 कान करै जी । मनमान्यां दुख देहिं, काहूसों  
 न डरै जी ॥ ३ ॥ कबहुं इतर निगोद, कबहुं  
 नर्क दिखावैं । सुरनर पशुगतिमाहिं, बहुविधि  
 नाच नचावैं ॥ ४ ॥ प्रभु ! इनके परसंग, भव  
 भवमाहिं बुरे जी । जे दुख देखे देव !, तुमसों  
 नाहिं दुरे जी ॥ ५ ॥ एक जन्मकी बात, कहि  
 न सकों सुनि स्वामी ! । तुम अनन्त परजाय,  
 जानत अंतरजामी ॥ ६ ॥ मैं तो एक अनाथ,  
 ये मिलि दुष्ट घनेरे । कियो बहुत बेहाल, सुनि-  
 यो साहिब मेरे ॥ ७ ॥ ज्ञान महानिधि लूटि,  
 रंक निबल करि डास्यो । इनही तुम मुझमाहिं,  
 २ जिन ! अंतर पास्यो ॥ ८ ॥ पाप पुन्यकी

दोड़, पाँयनि वेरी डारी । तन काराग्रहमाहिं,  
 मोहि दियो दुख भारी ॥ ९ ॥ इनको नेक वि-  
 गार, मैं कछु नाहिं कियो जी । विनकारन जग-  
 बंध !, बहुविधि वैर लियो जी ॥ १० ॥ अब  
 आयो तुम पास, सुनि जिन ! सुजस तिहारो ।  
 नीतनिपुन जगराय !, कीजे न्याव हमारो ॥११॥  
 दुष्टन देहु निकास, साधुनकों रखि लीजे । विनवै  
 भूधरदास, हे प्रभु ! ढील न कीजे ॥ १२ ॥

७७. गुरुकी विनती ।

( नग-नरतगी । डोहा । )

ते गुरु मेरे मन वसो, जे भव जलधि  
 जिहाज । आप तिरैं पर तारहीं, ऐसे श्रीऋषि-  
 राज ॥ ते गुरु० ॥ १ ॥ मोह महारिपु जीतिकैं,  
 छांड्यो सत्र घरवार । होय दिगम्बर बन वसे,  
 आतम शुद्ध विचार ॥ ते गुरु० ॥ २ ॥ रोग-  
 उरग-विल वंपु गिण्यो, भोग भुजंग समान ।  
 कदली तरु संसार है, त्यागो सब यह जान ॥  
 ते गुरु० ॥ ३ ॥ रतनत्रय निधि उर धरै, अरु

निग्रन्थ त्रिकाल । मार्यो काम खवीसको,  
 स्वामी परम दयाल ॥ ते गुरु० ॥ ४ ॥ पंच महा-  
 व्रत आदरै, पांचों सुमति समेत । तीन गुपति  
 पालै सदा, अजर अमर पद हेत ॥ ते गुरु० ॥ ५ ॥  
 धर्म धरै दशलक्षणी, भावै भावना सार । सहै  
 परीसह बीस द्वै, चारित-तन-भँडा ॥ ते गुरु०  
 ॥ ६ ॥ जेठ तपै रवि आकरो, सूखै सरवरनीर ।  
 शैल-शिखर मुनि तप तपै, दाँझै नगन शरीर ॥  
 ते गुरु० ॥ ७ ॥ पावस रैन डगवनी, वरसै जल-  
 धर-धार । तरुतल निवसै साहसी, वाँजै झंझा-  
 वार ॥ ते गुरु० ॥ ८ ॥ शीत पड़ै कपि-मद गलै,  
 दाहै सब वनराय । ताल तरंगनिके तटै, ठाड़ै  
 ध्यान लगाय ॥ ते गुरु० ॥ ९ ॥ इहि विधि  
 दुद्धर तप तपै, तीनों कालमँझार । लागे सहज  
 सरूपमें, तनसों ममत निवार ॥ ते गुरु० ॥ १० ॥  
 पूरव भोग न चिंतवै, आगम वाँछा नाहिं ।  
 चहुँगतिके दुखसों डरै, सुरति लगा शिव-

१ तेजीसे । २ जलवै । ३ चलती है । ४ बरसाती हवाको  
 ... कहते हैं ।

माहिं ॥ ते गुरु० ॥ ११ ॥ रंगमहलमें पौढ़ते,  
 कोमल सेज विछाय । ते पच्छिमनिशि भूमिमें,  
 मोर्वें संवरि काय ॥ ते गुरु० ॥ १२ ॥ गज  
 चढ़ि चलते गरवसों, सेना सजि चतुरंग ।  
 निरखि निरखि पग वे धरें, पालें करुणा अंग ॥  
 ते गुरु० ॥ १३ ॥ वे गुरु चरण जहां धरें,  
 जगमें तीरथ जेह । सो रज मम मस्तक चढ़ौ,  
 भूधर मांगै येह ॥ ते गुरु० ॥ १४ ॥

७८. पंचनमोकारमंत्रमाहात्म्यकी ढाल ।

श्रीगुरु शिक्षा देत हैं, सुनि प्रानी रे ! सुमर  
 मंत्र नौकार, सीख सुनि प्रानी रे ! लोकोत्तम  
 मंगल महा, सुनि प्रानी रे ! अशरन-जन-आधार,  
 सीख सुनि प्रानी रे ! ॥ १ ॥ प्राकृत रूप अ-  
 नादि हैं, सुनि प्रानी रे ! मित अच्छर पैतीस,  
 सीख सुनि प्रानी रे ! पाप जाय सब जापतैं,  
 सुनि प्रानी रे ! भाष्यो गणधरईश, सीख सुनि  
 प्रानी रे ! ॥ २ ॥ मन पवित्र करि मंत्रको, सुनि  
 प्रानी रे ! सुमरै शंका छोरि, सीख सुनि प्रानी  
 रे ! वांछित वर पावै सही, सुनि प्रानी रे !

शीलवंत नर नारि, सीख सुनि प्राणी रे ! ॥३॥  
विषधर-बाघ न भय करै, सुनि प्राणी रे ! विनसैं  
विघन अनेक, सीख सुनि प्राणी रे ! व्याधि वि-  
षम-विंतर भजैं, सुनि प्राणी रे ! विपत्त न व्यापै  
एक, सीख सुनि प्राणी रे ! ॥ ४ ॥ कपिको शि-  
खरसमेदपै, सुनि प्राणी रे ! मंत्र दियो मुनिराज,  
सीख सुनि प्राणी रे ! होय अमर नर शिव वस्यो,  
सुनि प्राणी रे ! धरि चौथी परजाय, साख सुनि  
प्राणी रे ! ॥ ५ ॥ कह्यो पदमरुचि सेठने, सुनि  
प्राणी रे ! सुन्यो बैलके जीव, सीख सुनि प्राणी  
रे ! नर सुरके सुख भुंजकै, सुनि प्राणी रे ! भयो  
राव सुग्रीव, सीख सुनि प्राणी रे ! ॥ ६ ॥ दीनों  
मंत्र सुलोचना, सुनि प्राणी रे ! विंध्यश्रीको जोइ,  
सीख सुनि प्राणी रे ! गंगादेवी अवतरी, सुनि  
प्राणी रे ! सर्प-डसी थी सोइ, सीख सुनि प्राणी  
रे ! ॥ ७ ॥ चारुदत्तपै वनिकने, सुनि प्राणी रे !  
पायो कूपमँझाग, सीख सुनि प्राणी रे ! पर्वत ऊ-  
पर छाँगने, सुनि प्राणी रे ! भये जुगम सुर सार,

सीख सुनि प्रानी रे ! ॥ ८ ॥ नाग नागिनी  
जलत हैं, सुनि प्रानी रे ! देखे पासजिनिंद,  
सीख सुनि प्रानी रे ! मंत्र देत तव ही भये, सुनि  
प्रानी रे ! परमावति धरनेंद्र, सीख सुनि प्रानी  
रे ! ॥ ९ ॥ चहलेमें हथिनी फँसी, सुनि प्रानी  
रे ! खग कीनों उपगार, सीख सुनि प्रानी रे !  
भव लहिकै सीता भई, सुनि प्रानी रे ! परम  
सती संसार, सीख सुनि प्रानी रे ! ॥ १० ॥  
जल मांगै शूली चढ्यो, सुनि प्रानी रे ! चोर  
कंठ-गत-प्राण, सीख सुनि प्रानी रे ! मंत्र सि-  
खायो सेठने, सुनि प्रानी रे ! लह्यो सुरग सुख-  
थान, सीख सुनि प्रानी रे ! ॥ ११ ॥ चंपापुरमें  
ग्वालिया, सुनि प्रानी रे ! घोखै मंत्र महान,  
सीख सुनि प्रानी रे ! सेठ सुदर्शन अवतर्यो,  
सुनि प्रानी रे ! पहले भव निरवान, सीख सुनि  
प्रानी रे ! ॥ १२ ॥ मंत्र महातमकी कथा, सुनि  
प्रानी रे ! नामसूचना एह, सीख सुनि प्रानी रे !  
श्रीपुन्यास्रवग्रंथमें, सुनि प्रानी रे ! तारे सो सुनि

१ कीचड़में । २ विद्याधरने ।

५ भाग ३



लेहु, सीख सुनि प्रानी रे ! ॥ १३ ॥ सात-विसन  
 सेवन हठी, सुनि प्रानी रे ! अधम अंजनां चोर,  
 सीख सुनि प्रानी रे ! सरधा करते मंत्रकी, सुनि  
 प्रानी रे ! सीझी विद्या जोर, सीख सुनि प्रानी रे !  
 ॥ १४ ॥ जीवक सेठ समोधियो, सुनि प्रानी रे !  
 पापाचारी खान, सीख सुनि प्रानी रे ! मंत्र प्रतापें  
 पाइयो, सुनि प्रानी रे ! सुंदर सुरग विमान, सीख  
 सुनि प्रानी रे ! ॥ १५ ॥ आगें सीझे सीझि है, सुनि  
 प्रानी रे ! अब सीझैं निरधार, सीख सुनि प्रानी  
 रे ! तिनके नाम बखानतैं, सुनि प्रानी रे ! कोई  
 न पावै पार, सीख सुनि प्रानी रे ! ॥ १६ ॥ बैठत  
 चिंतै सोवतैं, सुनि प्रानी रे ! आदि अंतलौं धीर,  
 सीख सुनि प्रानी रे ! इस अपराजित मंत्रको,  
 सुनि प्रानी रे ! मति बिसरै हो ! वीर, सीख सुनि  
 प्रानी रे ! ॥ १७ ॥ सकल लोक सब कालमें, सुनि  
 प्रानी रे ! सरवागममें सार, सीख सुनि प्रानी रे !  
 भूधर कबहुं न भूलि है, सुनि प्रानी रे ! मंत्रराज  
 मन धार, सीख सुनि प्रानी रे ! ॥ १८ ॥

७९. करुणाष्टक ।

करुणा ल्यो जिनराज हमारी, करुणा ल्यो ॥  
 टेक ॥ अहो जगतगुरु जगपती, परमानंदनिधा-  
 न । किंकरपर कीजे दया, दीजे अविचल थान ॥  
 हमारी० ॥ १ ॥ भवदुखसों भयभीत हों, शिवपदवां-  
 छा सार । करो दया मुझ दीनपै, भवबंधन निर-  
 वार ॥ हमारी० ॥ २ ॥ पस्यो विषम भवकूपमें, हे  
 प्रभु ! काढ़ो मोहि । पतितउधारण हो तुम्हीं, फिर  
 फिर विनऊं तोहि ॥ हमारी० ॥ ३ ॥ तुम प्रभु पर-  
 मदयाल हो, अशरणके आधार । मोहि दुष्टदुखदेत  
 हैं, तुमसों करहुँ पुकार ॥ हमारी० ॥ ४ ॥ दुःखित  
 देखि दया करै, गाँवपती इक होय । तुम त्रिभुव-  
 नपति कर्मतैं, क्यों न छुड़ावो मोय ॥ हमारी०  
 ॥ ५ ॥ भव-आताप तवै भुजैं, जव राखों उर  
 धोय । दया-सुधा करि सीयरा, तुम पदपंकज  
 दोय ॥ हमारी० ॥ ६ ॥ येहि एक मुझ वीनती,  
 स्वामी ! हर संसार । बहुत धज्यो हू त्रासतैं,  
 विलख्यो वारंवार ॥ हमारी० ॥ ७ ॥ पदमनंदिको

अर्थ लैं, अरज करी हितकाज । शरणागत  
भूधरतणी, राखौ जगपति लाज ॥ हमारी० ॥८॥

/८०. गजल ।

रखता नहीं तनकी खबर, अनहद बाजा बा-  
जियां । घटबीच मंडल वाजता, बाहिर सुना तो क्या  
हुआ ॥ १ ॥ जोगी तो जंगम सेवड़ा, बहु लाल  
कपड़े पहिरता । उस रंगसे महरम नहीं, कपड़े रंगे  
तो क्या हुआ ॥ २ ॥ काजी किताबैं खोलता,  
नसीहत बतावै औरको । अपना अमल कीन्हा  
नहीं, कामिल हुआ तो क्या हुआ ॥ ३ ॥ पोथीके  
पाना बांचता, घरघर कथा कहता फिरै । निज  
ब्रह्मको चीन्हा नहीं, ब्राह्मण हुआ तो क्या हुआ  
॥ ४ ॥ गांजारुभांग अफीम है, दारू शराबा पो-  
शता । प्याला न पीयाप्रेमका, अमली हुआ तो  
क्या हुआ ॥ ५ ॥ शतरंज चौपरगंजफा, बहु  
मर्द खेलैं हैं सभी । बाजी न खेली प्रेमकी, ज्वारी  
हुआ तो क्या हुआ ॥ ६ ॥ भूधर बनाई वीक्षती,  
श्रोता सुनो संब कान दे । गुरुका वचन माना  
नहीं, श्रोता हुआ तो क्या हुआ ॥ ७ ॥

